

JOSEF MARCHET

CUINTRISTORIE DAL FRIÛL



CLAPE CULTURÂL ACUILEE
UNIVERSITÂT DE TIERCE ETÂT

TABELE

Jentrade	2
Prefazion dal autôr	6
Il nestri čoc	8
Akileja	10
I Latîns	12
La lenghe di Acuilee	15
La dominazion romane	17
Lis invasions	19
La dominazion langobarde	21
I Sclâvs	23
Grau	25
Cividât	27
Berengari l'unitari	30
Formazion dal Patriarçhât	32
Il Friûl todesc	34
Patriarçhis e Cumons	37
Il Parlament	40
I patriarçhis talians	43
La sgrife di Vignesie	46
La fin dal Patriarçhât	48
La dominazion di Vignesie	51
Vignesie e i patriarçhis	54
Nobiltât e Contadinance sot di Vignesie	57
I benefizis di Vignesie	60
Chel dai spirons d'aur	63
I cincuante agns da l'Austrie	66
Dal '48 al '66	69

JENTRADE

La storie che di scuelârs nus àn insegnât, simpri sflandorose e penge di amôr patri - une reson par ogni šielte, anče s'a jere une falope; une justificazion par ogni vuere - a jere simpri discompagne di chē che i viēj nus contavin d'Unviēr. La storie uficiâl a veve un quart ugnul dulà rivâ, chē dai viēj a veve i puarts sunt'un altre rive. I viēj a puartavin tal ricuard dolōrs e sperancis di lâ in miôr; i mestris a vevin il dovè di fânus čhatâ dučh adun, prodots di une storie unitarie vignude di trois antîcs ma cence plui valôr. Ogni altri popul che nol sedi stât roman o derivât, al jere barbar. I viēj a clamavin vuere la vuere e bûfulis la retòriche. E il furlan sclet dai viēj al sturnive lis orelis dai siōrs.

I timps dai viēj a jerin spartîts in vueris e daspò-vueris. E no vevin mai vitoriis. Lis vueris a jerin patî, murî, bandonâ la famee, fâsi distrugi lis čhasis, tornâ a fâlis sù e viodilis a disdrumâ indaûr di gnovis canonadis. Pai inteletuâj (ma no dučh) al jere “dulce et decorum pro patria mori”. Lu scrivevin sui monuments pai muarts.

In čhase la patrie a jere la famee, i vons, la sô int, l'amôr, il progredî, il lavorâ fin tes stelis. Al jere difîndisi se cualchidun ti vignive cuintri, ma mai lâ a cirîlis, mai pleâ e sčhafojâ altris popuj; rispietâ ogni omp, ogni ģhernazie, ogni lenghe, ogni religion. I libris uficiâj e chej dai “benpensants” a naševin al servizi di un ideâl e a chel ideâl si pleavin comedand i fats. Dal rest i libris a vignivin dai storics e i storics a jerin al servizi dal princip che ju mantignive. E i princips, il podè int'une peraule, a fasevin aleancis e vueris, a pastročhavin pòlitiche e interès che il popul al pajave cun distruzions e mačalizis.

La storie ančhemò vuê nus ven tornade mediant figuris, grandis e pičulis daûr dai servizis che ur fasevin a cui ch'al dominave,

figuris ch'e àn jemplât di cuadris i nestrîs museus. Il popul al jere chel ch'al pajave, pioris di macel.

O pensìn che Josef Marchet in chestis paginis nol fasi altri che di dâur vôs a lis contis dai viêj: resonâ sui fats storicis e vê il coraĝ di lâ cuintriman tornand a scriviju. No fâ di storie liende, ma tornâ a lei insot il scori dai secuj, tornâ a lei cun serietât e rigôr i timps, netâju dai strafaničs e des sprofumadis dai storicis e dai agiografs, diliberâju dai mîts che i ideoligs j àn costruît sore. A fâ cuintristorie si risče di sbrissâ int'un altri pericul: chel di fâ i bastiancontraris, chel di meti scrupuj anče tes robis claris, chel di fâ ideologie e demagogie al incontrâr. Ma Marchet si è documentât e al dà reson di ogni judizi storic ch'al pand.

Fevelâ mâl di Vignesie cuanche Vignesie a jere ĝa un toc da l'Italie che si faseve, fevelâ cuintri dal mît dal Risorgiment e magari dî ben di une buine aministrazion austriache al veve di sunâ unevore mâl tes òrelis di chej ch'a stevin simpri cun cui ch'al vinč. Fevelâ po di un Stât furlan našût di lidrîs antighis e diventât proget pal nestri popul, proget che intrigants e parons di ogni seson e àn fat impastanâ, a jere apostasie cuintri dal sacri de unitât "nazionâl", anče se si trate nome di cuistions storichis.

Si à dit, cuanch'a son vignudis fûr lis paginis ch'o tornìn a presentâ culi, si à dit che salacôr Marchet si è lassât čhapâ la man dal masse amôr pal so popul. Se propit a fos vere, si podarès dî che nol jere altri che il cuintripês, de bande de nestre int, di une storie scrite dome in non dai parons e di ideologiis nazionalistichis.

Ma il spirt di Marchet nol jere di sigûr chest. La sô serietât j faseve čhalâ insot i fats di princips e sovrans par tornâ a staĝâ dut tignind cont dal ben di dučh. Une scritture insumis ch'a ves rispjet de storie cence scuindi ni ben e ni mâl. E in chest sens la cuintristorie a fo une gnovitât te storiografie dal Friûl, un at di

ricupar de veretât fûr de montagne di sfloçhis che une storiografie conformiste a veve ingrumât.

Ma no jè nome cheste la reson di une gnove edizion de Cuiintristorie di Josef Marchet che la Clape culturâl Acuilee e l'Universitât de tierce etât a proponin. Un'altre buine reson a jè che chestis paginis a son un esempi di biele scriture e di furlan sclet su arguments di impegn culturâl int'un moment dificil pe lenghe ch'a jè daûr, magari cussì no, a spanîsi, a dialetigâsi, a pierdi il so savôr plui vêr.

A presentâ te cuvierte cheste riedizion de cuiintristorie al è un dai plui grançh nons de piture e de šenografie filmistiche europeane: Ul de Rico, venastaj Ulderico Gropplero di Troppenburg, furlan. La sô vore a fâs ançhemò plui preciose cheste ristampe.

Marchet Josef

(Glemone 1902 - Udin 1966)

Predi, professôr, publicist, lenghist, leterât, storiograf, storic e critic da l'art. Bibliografie: *Lineamenti di grammatica friulana* (Udine 1952 e 1967); *La scultura lignea in Friuli* (Milano 1956); *Friuli. Uomini e tempi* (Udine 1959 e 1974); *Letaris ai furlans* (Udin 1966); *Le chiesette votive del Friuli* (Udine 1971 e 1982); *Cuintristorie dal Friûl* (Udin 1974 e 1977); *Lis predichis dal muini* (Udin 1975); *La Patrie* (Udin 1976).

Ul de Rico (Gropplero Ulderico)

(Murùs 1944)

Pitôr, ritratist, šenarist, costumist, scritôr e inustradôr di libris. Al à creât šenaris, costums e creaturis fantastichis dal film *La storia infinita* (1981-1984); šenaris pe *Tetralogìe* di Richard Wagner par l'Opéra di Zuric (1987-1989); test e inustrazions par putròs libris come *I Coboldi degli Arcobaleni* (1977), *Der Ring des Nibelungen* (1978-1979) e *The Legend of Te Tuna* (1986), voltâts in cetantis lenghis.

PREFAZION DAL AUTÔR

Dučh si lu sa che la storie, come ch'a ven esplicade tes scuelis, e à plui parintât cu la “educazion nazionâl” che no cu la veretât.

A son i parons dal vapôr ch'a stabilišin ce ch'al va contât e ce ch'al va tasût: al baste pensâ a Napoleon o al nestri gloriôs “menedôr”. E ogni volte che la buere politiche a mude direzion, a scuegnin mudâle anče i libris di storie: la veretât e à tantis musis che si vûl, se si sa parâle atôr daûr l'ajar ch'al sofle e metile al servizi de politiche.

I scuelârs di chestis anadis lu viodin e lu san. A jè une sole robe che no mude, la plui ridicule e antisociâl di dutis: il spirt nazionalistic ch'al cîr di dâj d'intindi a ognidun che il so paîs e la sô int a son i prins, i plui grančh, i plui brâvs dal mond. Pai Francês la France a jè il braç di Diu: *Gesta Dei* per Francos; pai Todescs il germanic al è il *Herrenvolk*, il popul paron dal mond; pai Talians a jè veretât santissime il “Primato morale e civile degli italiani”. E Di' vuardi a no crodi! Cui che nol crôd a chestis robis, nol pò jessi pront a fâsi sbudielâ pe patrie: e chest al impuarte plui di dut a ogni guviêr!

Cuintri di chest stupid malcostum a salte fûr, ogni tant, une vôs invelegnose che j sgnache in muse a la storie ufiziâl juste chês robis che la storie ufiziâl a cîr simpri di tignî taponadis. Par cont di noaltris al baste menzonâ “La lotta politica in Italia” di A. Oriani, fanatic e fašist denant da l'ore, ma a so mûd cuintriconformist; “Il fantasma liberale” di G. Colamarino; e ultime e plui furiose di dutis, la “Antistoria d'Italia” dal triestìn F. Cusin. Nol è di dî che in chesčh libris si puedi čhatâ un vanzeli o une obietivitât di meti la man sul fûc: a fuarce di volê lâ cuintri il conformisim uficiâl, a colin int'un conformisim contrari. Ma ungrum di veretâts coraĝosis si čhatilis; e,

senò altri, si à la sodisfazion di viodi almancul cualchidun a petâ cul picon intôr di une construzion impastade di lujaniis.

La storie dal Friûl, par fortune, tes scuelis no si insegnile: cui sa ce mignestre ch'a vignarès fûr! Ma, o pôc o trop, sui sfueis, tai discors, in cualchi libri, si tirile in bal: nanche di dîlu in sens nazionalistic. Veretâts dogmatichis fundamentâls: 1n la grandece e la civiltât dal Friûl a fo òpare di Rome; 2d la salvece dal Friûl cuintri la barbarie todesche a fo mert di Vignesie; 3č la plui grande brame e fortune dal Friûl a fo chê di jessi unît a l'Italie. Rome, Vignesie e l'Italie a forin chês che nus puartarin ogni ben: onôr, glorie, civiltât, prosperitât, potence e vie indenant. Conclusion: noaltris o scugnìn jessi lis "sintinelis" impavidis de Romanitât, de Venezianitât, de Talianitât cuintri i lôr tradizionâj aversaris; e fâsi copâ.

E s'o provassin a fâ un fregul di cuintristorie dal Friûl, lassand di bande dutis lis sfloçhis e i prejudizis, e contand anche chês robis che ai "parons" no ur vadin masse a scure? No par çholiur di man lis armis a lis "sintinelis", ma parcè ch'a jè ore che ognidun al fasi ce ch'al crôd so dovè cunt'one cušience plui drete e positive e no par efiet di bùfulis propagandistichis.

Udin, Novembar dal 1950

IL NESTRI ČOC

A volê čhaminâ sul sald, si à pôc ce contâ su la preistorie dal Friûl. Ce che aromai al pâr sigûr al è che la lidrîs de nestre int a jè celtiche. I Celtics a forin la prime butade di popuj “aria” ch’a rivà in Europe. Salacôr doi mil agns prin di Crist, i prins trops a jerin ġa sui confins orientâj. Il gruès di cheste int si stanziarin dulà ch’a našin lis aghis plui grandis: la Donàu, l’Elbe, il Rain e, dilung-fûr dal cors de Donàu, fintremai dilà di Viene. In Svuizare a La Tène e in Austrie a Hallstadt a forin scuviertis lis plui antighis relicuis di cheste raze. Daspò di vê čhatadis, tes monts, lis ġhavis di fiêr, i Celtics a sviluparin l’industrie di chest metal ančhemò cuanche chej altris popuj a cognoševin apene il bronġ; e cu lis armis di fiêr si sparničarin in lung e in larg, de Spagne in France, in Anglie, in Italie, in Boemie e jù pai Balcans fintremai in Asie Minôr, simpri land indenant par donghe des grandis aghis. La prime grande civiltât europeane a fo la civiltât celtiche, la civiltât de nestre čoče.

I Celtics a jerin dividûts in putròs grops che si governavin in forme republicane, plui di râr in forme di pičulis monarchiis. Un di chesčh grops al jere chel dai “Karn” che si stanziarin in chês regions che a puartin ančhemò chel non: Carintie, Cragne e Čhargne.

Il distîn al à volût che il Paîs dai Carnics al diventàs la beorče indulà che si trussin altris tre razis vignudis daspò: la germaniche, la latine e la sclave, rompind une unitât ch’a jere ġa pôc salde pes grandis monts che le rompevin.

I Carnics ch’a ocuparin il Friûl a partignivin, dunče, a un ramač disferent di chej Celtics che, de Svuizare o de Ģhalie, a rivarin ta l’Alte Italie: tra chej e chesčh a restà simpri la barriere dai Venits, popuj di raze iliriche che in Friûl no si fermarin altri che tal

čhanâl dal Nadison (parsore di San Pieri dai Sclavons al fo čhatât un gran cimitieri di Venits e un altri dilà di Cividât).

Nissun nol pò dî cuanch'a rivarin i Carnics tes nestrîs monts, ma al è facil ch'a sedin vignûts un pieç di timp denant di ce ch'a disin i storicis. I vanzums dai Euganis tal čhanâl dal Lusinč e chej dai Venits tal čhanâl dal Nadison a son ritignûts plui antîcs de rivade dai Carnics: ma al va dit che i Carnics, in tal prin, a restarin lontans di chesçh čhanâj e che no lassarin stamps dai lôr stanziaments nanče plui tard cuanche, daûr di ce ch'a disin i storicis, si čhatavin dal sigûr tai nestrîs paîs. Vadî parcè ch'a varan usât a brusâ i cadavars, no jè stade čhatade nanče une tombe celtiche; e altris vanzums de lôr industrie no saran restâts parviè che i Celtics no si slontanarin plui dal Friûl ma ch'a restarin dulà ch'a jerin, transformand un pôc a la volte l'industrie e lis costumancis lôr daûr di chês dai popuj che ju tignivin sot. Paraltri ultimementri a jè stade scuvierte une antighe citât celtiche sul Magdalensberg, in Carintie, sapulide sot des maseriis di un'altre citât che i Romans a vevin costruide parsore; e al pò stâj che, cul timp a lâ, cualchi čhosse interessant a puedi vignî fûr anče in Friûl. Sigûr che, doi secuj denant di Crist, cuanche i Romans a implantarin Acuilee, i Celtics carnics a jerin parons de region: no trop fis, ma sparničâts scuasi pardut.

AKILEJA

Si pò dî che dibot nissun di tançh ch'e àn tratade la storie dal Friûl vedi mai olsât meti in dubi che Acuilee a sedi stade implantade dai Romans: al bastarès çhalâ il non. E po il storic latìn Titus Livius al conte cun dute la precision cuand e cemûd ch'a fo implantade.

Ma il non di Acuilee nol è latìn, come ch'al pâr: al finiš in -eja, - tanche Noreja e Celeja - che no jè finâl latine ma celtiche. "Akileja" al vûl dî "citât sul Akilis" (ch'al à di jessi il non di une aghe) e nol à nissune parintât cu l'acuile. E des bandis di Acuilee a son stadis çhatadis monedis d'arint celtichis dal tierç secul prin di Crist (i Romans a saressin rivâts dal 186 p.d.C.) e ogni tant li al salte fûr cualchi imprest dal genar di chej di La Tène, ch'al ven a jessi di ungrum di secuj denant.

Il Friûl al jere, dunçhe, abitàt dai Carnics fintremai sul mâr. I Romans no fondarin Acuilee ma a implantarin in chel sît une colonie latine, salacôr daspò di vê sdrumade l'"Akileja" celtiche. Ce ch'al conte Livius sul implant de colonie al pò jessi vêr, parcè che lui al veve sot dai vôi i documents ufiziâj dal guviêr roman; ma ce ch'al conte prin, su l'invasion dai Celtics transalpîns ch'a saressin vignûts dal 186 p.d.C., par stradis mai cognošudis e mai praticadis, in numar di 20.000 armâts a implantâ une citât int'un sît disabitât, abàs des monts, e che i Romans ju varessin parâts indaûr sdrumand la citât e comandan'iur di no fâsi viodi plui, a jè nome une des solitis tradizions che si creavin a Rome par justificâ in cualchi maniere lis vueris e i maçalizis che i Romans a fasevin par ingrandî il lôr domini e lis lôr risorsis. Livius al fâs simpri cussì: al staronge la storie cu la tradizion popolâr, in mûd ch'a deventi une esaltazion di Rome e des sôs impresis (par chel il Mommsen al scrivè la sô famose *Storie di*

Rome cence vê nanče inniment lis contis di chest padoan inromanât).

In realtà, ogni pôc che si abadi, si scuèn dî che Livius, in chest pont, al scrîv robis impossibilis o cuinristantis: cemûd mai i Celtics de Carintie o dal Stajar, crešûts di numar, si varessino impensâts di bandonâ chês pozisions cussì bielis, viertis e fertilis, par vignî a stabilîsi int'un Friûl salvadi e pûar di risorsis? No varessino podût slarghâsi plui in là o plui in sù? E cemûd si puedial crodi che 20.000 armâts, cun fêminis e fruts e cui lôr grabatuj, a vedin podût vignî fûr pal çhanâl dal Fiêr o pal Mont di Crôs, co nol jere nanče un segnâl di troi ma nome bosc e ruvîs?

E po Livius int'un lûc al dîs che culî no çhatarin nissun abitant e int'un altri al lasse capî ch'a vevin puartade vie ungrum di robe ai abitants indulà ch'a jerin passâts. Dal arest a son tantis e tantis lis provis che in Friûl a jerin ungrum di Celtics prin ch'a rivassin i Romans e che no sçhamparin ma ch'a restarin anče daspò. La storie de invasion dai transalpîns a coventave per fâ viodi che la colonie romane di Acuilee a jere stade implantade par necessitâts strategichis.

I LATINS

Che la čhadene des nestrîs monts a sedi un confîn naturâl e... sacramentâl tra il mond latin e chel altri, al è un vanzeli co si trate di chej dilà ch'a cirin di vignî dicà, a jè une monade cuanche a chej dicà ur ven la spice di passâ dilà.

I prins a tirâle fûr a forin dunche i Romans, par vê une scuse, co ur vignî tal čhâv di fâsi parons di cheste region indulà che no vevin mai metût pîd e che un altri popul si čhatave a vivi dopomai. E di chê volte in ca la cuestion dal confîn creât dal Signôr a ven tirade fûr ogni volte ch'a comode e tasude ogni volte che no va ben: al timp di Otavian i Romans a jerin su la Donàu, in Germanie e in Britanie, e ġa vot agns i Talians a jerin a Lubiane e a Menton, in barbe a la volontât di Diu ch'al à creât il confîn naturâl des monts!

L'implant di une colonie latine a Acuilee al jentre tal cuadri de politiche cuintrinsiceltiche che Rome a steve fasind in chej agns. In chê volte de grande vuere cuintri di Nibil (Hannibal), dučh i Celtics da l'Alte Italie a vevin sperât di podê deliberâsi de paronance dai Romans e si jerin metûts cuintri di lôr. Dopo la scòpule čhapade a Zama, i Cartaginês a vevin scugnût fâ la pâs cun Rome (a. 201), ma i Celtics no le vevin fate. I prins vinčh agns dal II secul p.d.C. a forin spindûts dai Romans a čhastiâ chest popul e lu čhastiarin cun mačalîzîs spaventôs, cun deportazions e cul implantâ e rinfuarçâ coloniis in dute l'Alte Italie: cul disnazionalizâle, al vignarès a jessi. In cheste maniere a čhatavin anče la fate di mantignî lis lôr promessis cun chej altris popuj, plui vicîns, che ur vevin dât jutori di soldâts e di manġhative te vuere cuintri dai Cartaginês: a menavin sù i ex-combatents di chês bandis e ur devin tiere e sclâvs celtics par lavorâle.

In Acuilee, dal 181 p.d.C., a rivarin sù 3.000 fameis (15 o 20 mil di lôr) in buine part dal Samnium (in vuê Abruç, Molîs e part de Campanie): une vere invasion di bassarûj. Si stabilirin te gnove colonie e si spartirin il teren. Si pò calcolâ che dut il plan, dicà dal Tiliment e fintremai dapîd dai cuej, al sedi stât dividût in tançh “fonz” di un 35 çhamps; tre mil fonz di 35 çhamps furlans di vuê (50 araduris) a son passe centmil çhamps di misure, cence contâ il di plui ch’al fo dât ai centurions e ai cavalîrs (ai centurions 70 çhamps, ai cavalîrs un centenâr di çhamps paromp; i centurions a saran stâts une trentine, i cavalîrs no si pò dî tros).

Dodis agns daspò, a forin mandadis altris 1500 fameis latinis e chestis a varan scugnût adatâsi a implantâ i lôr fonz sui cuej o in chej sîts che no jerin ġa stâts consegnâts ai prins. Tratansi di une colonie militâr, i umign a restavin obleâts al lôr servizi in Acuilee o in cualchi piçul presidi ch’al sarà stât implantât su lis pozitions strategichis; sul so fonz ognidun al varà mandât un fatôr (*servus villicus*) e chel numar di sclâvs ch’al coventave par fâ lis voris. Si pò crodi che almancul une part di chesçh sclâvs a fossin, come il solit, int çhapade sul puest e salacôr i antîcs proprietaris.

Cussì la Furlanìe a colave sot di un paron dûr, risolût a no molâle ni par pôc ni par trop.

Acuilee a fo, in tal prin, une citât di 30.000 abitants, cence contâ i Carnics che si çhatavin a jessi ġa sul puest; ma in curt a diventà plui grande par popolazion e impuartance, parcè che par un secul e mieġ a fo l’uniche colonie latine de Vignesie orientâl e simpri, pôc o trop, in pericol. J forin dâts i “derîts latîns” e no chej dai citadîns romans, almancul tai prins tîmps: e chest al pò volê dî che di Romans di Rome an’ veve di jessi pôs.

Sul cont da l’ocupazion efietive, si pò adimplen dividi la region in tre parts: il litorâl, dulà ch’al podeve jessi coltivât, e il plan a forin

ocupâts dal dut e in pôc timp latinizâts; la part di mieĝ fintremai sot des monts a fo ocupade daspò midiant di fatoriis implantadis ca e là, ma la popolazion a restà la pluipart carniche e par cualchi secul a conservà la sô lenghe; tes monts a fo implantade cualchi “statio” e cualchi presidi nome su lis stradis che plui tard a vignirin viertis: Ğui (Julium Carnicum) al fo implantât un secul e mieĝ daspò.

Cheste division a risulte tant da l’archeologie come de toponomàstiche.

LA LENGHE DI ACUILEE

I Latins, daspò implantade la colonie militâr di Acuilee, a deventarin i parons de Furlanie ma no formarî mai il gruès de popolazion. Nome te citât e salacôr te Basse a saran stâts, daspò cualchi secul, in majorance; ma si saran pôc o trop miscliçâts cui Celtics in maniere che nol fos plui possibil çhatâ il çhaveç par disferenceâju. Par cui sa cetant timp i nostrans a saran lâts indenant cul lôr lengaĝ di prin.

Cussì d'in chê volte incà si è creade chê situazion ch'a dure ançhemò: che il popul al fevele une lenghe e i parons un'altre.

Daspò, un pôc a la volte, par amôr o par fuarce, la lenghe antighe a fo bandonade e si distudà par simpri. La popolazion a imparà a fevelâ la lenghe dai parons: no il latìn petenât dai scritôrs che si studiin a scuele, ma chel slavrât e sĝharnât dai soldâts, dai marçhadants, dai fatôrs e dai sclâvs. E lu tacà a fevelâ a so mûd, cun chê pronunzie e cun chê ghenghe che la lenghe antighe j veve lassade, cun cui sa cetantis peraulis celtichis, smorseand lis desinencis, imbastind il discors daûr de usance di prin, insumis formand un latìn "sui generis" come ch'al podeve jessi chel che si formave a Spalato, a Narbone, a Barcelone, d'indulà ch'a saltarin fûr daspò il dalmatic, il provençâl, il catalan. E chest latìn a finirin cul fevelâlu ançhe i nevôts e i dišindints drets o miscliçs dai prins fondadôrs de latinitât. Nome lis autoritâts tal lôr fevelâ o scrivi ufiziâl a varan doprade la lenghe leterarie di Rome che si çhatile ançhe tes inscrizions ch'a son restadis. E cussì a tornà a naši par un altri viers l'eterne situazion de dople lenghe.

In tai ultins tims dal imperi roman, Acuilee si çhatà a jessi a lung sot de buere de civiltât bizantine e orientâl. In Friûl e à di vê durât un biel pieç la religion celtiche e cualchi vanzum di chês

crovincis e pràtichis al restà anče daspò che il popul le veve bandonade. Ma anče diventand cristiane, la popolazion a implantà un complès di ceremoniis disferentis di chês che si fasevin a Rome e a Milan; e di li a našè la liturgie acuilejese ch'a mostrave ce clime di independence ch'a regnave chenti anchemò in chê volte. San Jaroni al conte che il vescul Fortunazian di Acuilee (IV secul) al scrivè un comentari ai Vanzêj "in lenghe rustiche": al ven a jessi in chel lengaĝ ch'a doprave la int. Chest al vûl dî che il popul d'in chê volte nol capive ben il latìn des scuelis e des personis studiadis; se no lu capive, si scuen pensâ ch'al fevelàs un lengaĝ unevore disferent: ni i vescuj di Milan, ni chej di Ravene o di Vercel no s'impensarin mai di fâ une čhosse di chest genar parcè che si viôd che i lôr fedêj a rivavin adore di capî il latìn ordenari. Pečhât che il lavôr di Fortunazian al sei lât pierdût: se si čhatassilu, si podarès vadì esplicâ tantis robis sul cont dal nestri lengaĝ di cumò.

Ma par capî che la latinitât acuilejese a veve di jessi une latinitât speciâl, disferente unevorute di chê des altris citâts talianis, al baste fâ un fregul di osservazion sun chel tant di latìn ch'al è passât te lenghe furlane di cumò. Il furlan al mostre anchemò, daspò tančh secuĝ, une fonètiche unevore disferente di chê di dučh i dialets da l'Alte Italie; al manten tal so vocabolari une sfilze di peraulis celtichis che no si čhatilis nanče in chej altris lengaĝs celtoromans; ungrum di tiermins ch'a son masculins tal latìn leterari, a son feminins par furlan o al incontrari; al à une sô maniere di formâ il plurâl dai nons; al à un sisteme di pronons e avierbs curiôs cunt'un tratament gramaticâl par so cont; al à ungrum di formis verbâls gnovis e disferentis di dučh i lengaĝs vignûts dal latìn. Chestis particularitâts no puedin jessi vignudis dentri de bande dai dialets vicins che no lis àn; a scuegnin dunče jessisi formadis anchemò tal lengaĝ di Acuilee che si è slarghât par dut il Friûl.

LA DOMINAZION ROMANE

La paronance di Rome sul Friûl a durà teorichementri sîs secuj e mieĝ (181 p.d.C. - 476 d.d.C.). In tant timp la region a varès vût di mudâ dal dut la sô muse e il stamp de gnove civiltât si varès di čhatâlu a ogni pîd alcât. Invezit, lassand di bande Acuilee, Cividât e Ğui, si pò dî che lis relicuis de “romanitât” vignudis fûr de tiere furlane fintremai cumò no son plui numerosis ni plui impuartantis di chês de civiltât di prin. Di chest nol è di smaraveâsi: che un popul al sčhafoi un altri e ch'al vadi a implantâsi int'un paîs forest par “puartâ la civiltât” a jè une di chês lujaniis che si scrivin sui libris di scuele. I parons foresčh, par antîc tanche in dî di vuê, a faserin e a fasin il lôr comod e il lôr interès, sfrutand miôr ch'a puedin lis risorsis dai sîts cuistâts, cence scomponisi di ce ch'al covente o ch'al ĝove a lis popolazions sogetadis.

I Latîns in Friûl no àn fat ni di miei ni di piês di ce ch'e àn fat i Anglês in Indie o i Spagnûj in Amêriche o i Francês in Afriche. A slarĝharin Acuilee par ordin che ur coventave slarĝhade, a faserin lavorâ la tiere daûr des bočhis ch'a vevin di mantignî, a viergerin stradis grandis e piçulis secontri che si presentave la dibisugne pai lôr trafics e pal moviment dai lôr soldâts, a implantarin cualchi borgade o cualchi “stazion” dulà che ur interessave par reson strategichis o ministrativis.

Di dučh chesčh lavôrs si pò dî che nome lis stradis a puartarin cualchi vantaĝ anče a chê int carniche ch'a restave simpri la part plui grande de popolazion. Cheste int no rivà mai adore di fâsi un puest te direzion politiche o ministrative, ni di vê un fregul di pês o di impuortance tal andament des čhossis, ni di vignî scoltade dai parons. Anče sul cont de difese militâr, i Latîns a pensarin nome par lôr: a rinfuarčarin la lôr citât di Acuilee, a implantarin une

fàbriche di armis pai lôr soldâts a Concuardie e cualchi “castrum” ca e là, che in pràtiche nol ğovà mai a fermâ o a intardâ lis invasions che si struĉharin chenti plui tard.

I sîs secuj e mieĝ de dominazion romane si puedin dividi in dôsetis dibot compagnis: tai prins tre secuj Acuilee a crešè di popolazion e di impuartance; i Celtics, pôc disponûts a adatâsi a vivi di sclâvs, a forin pestâts e talpinâts cence remission; al fo sistemât un ordenament ministratîv dut in man dai Latîns; a fo implantade une rêt di stradis e su lis stradis a našerin lis borgadis e lis “stazions”: dut par ordin dai parons e cul sudôr de popolazion locâl. In chej altris tre secuj e mieĝ, ch’al ven a jessi daspò di Traianus (+ 117 d.d.C.) il Friûl al fo simpri ĉhamp di batae o parviè des invasions (ch’a scomenĉarin sot di M.Aurelius, cui Marcomans e i Sarmatics) o parviè des vueris tra imperadôrs ch’a cirivin di ribaltâsi un cul altri. I Latîns no salvarin il Friûl ni des dôsetis invasions gotichis dal re Alarî (401, 408), ni di Atilè (452), ni di tantis altris tampièstis barbarichis ch’a rivarin chenti de bande di soreli jevât màssime tal ultin secul dal imperi roman occidentâl.

La dominazion romane si distudà sunt’un mâr di maseriis: Acuilee sdrumade, Ĝui scomparît, des fatorîis implantadis dai Romans restât nome cualchi non ca e là, di chej altris borgs o ĉhisĉhej e des stradis, juste cualchi memorie e cualchi vanzum ch’al tornà in lûs in chesĉh ultins tîmps.

A tirâ lis sumis, i Latîns a lassarin il Friûl piês di ce che lu vevin ĉhatât.

LIS INVASIONS

A jè usance di dâ il non di *invasions* a chês ch'a vegnin in Friûl de bande di soreli jevât e di *liberazions* a chês ch'a vegnin di soreli amont. Verementri i storics a lassin crodi che lis *invasions* a sedin rivadis di sore in jù. Ma cheste a jè une piçule imprecision; in dute l'antighitât e l'etât di mieĝ, la “via barbarorum” a fo simpri o chê dal litorâl o il çhanâl dal Nadison. Di chê bande a rivarin Alari, Atile, Teodurì, Albuin, i Onĝhars, i Turcs e fintremai i Todescs daspò Čhaurêt. De bande disore a rivarin, par antîc, nome i Celtics: ma chê no si pò dî ch'a sedi stade une *invasion*, parcè che dulà che lôr si postarin, par tant ch'al pâr, nol jere a stâ nissun: e inalore si varès di fevelâ di un “insediament”.

E sul cont di chês che si usin a clamâ *invasions* a sarès anchemò cualchi altre idee di dreçâ o di meti a fûc: i popuj ch'a rivarin in Friûl dal orient, a passarin dibot simpri fûr pe Basse, počhis voltis parsore di Udin; e cu lis lôr devastazions a sdrumarin pal plui lis citâts o i paîs e lis costruzions fatis dai Latins e a faserin maçalizi de popolazion latine o latinizade. La Stradalte a fo dispès il lôr coridôr. Plui insù, lis incursions di passaĝ no rivarin, e cun chês altris la int si visà nome di vê gambiât paron.

Anche il misclîcament des razis al fo plui o mancun fuart su la planure; ma sui cuej e massime tes monts la čočhe celtiche a restà dibot pure fintremai ai nestris timps: al baste fâ amenz ai caratars somatics e al temperament dai Čhargnej, dai Asîns, dai Tramontîns e dai montagnûj adimplen, in confront dai Furlans des bassis, par visâsi des disferencis.

Un spirt di contrarietà e di resistence e un lengaĝ crûd cuintri dai invasôrs si lu sint tai documents dai vescuĝ di chej timps. E si pò capî il parcè: l'organizazion de Glesie di Acuilee che si slarĝhave

sul Friûl, a veve unevore di elements orientâj, ma anče une buine part di personâl latin, e sul ordenament e su la mentalitât romane a jere insedade la vite religiose, anče se dispès - mæssime cu la cuistion dai “Tre Čhapituj” ch’a tignì il Friûl distacât de Glesie di Rome par un secul e mieĝ - a soflave un fregul di buere autonomistiche o d’influence orientâl (juste in chest timp i vescuj di Acuilee a scomenčarin a clamâsi “patriarčhis” come in orient).

Si pò anče crodi che sot di Odoaker e i prins Langobards lis glesiis cristianis a sedin stadis pôc o trop perseguitadis dai gnûvs parons che no jerin catolics. Paraltri al va dit, anče in chest cês, che la Glesie catoliche no à nuje ce vuadagnâ cun chel confondi e mešedâ catolicitât (ch’al ven a jessi “universalitât”) e latinitât o talianitât, ch’al vûl dî particularisim: a volê meti su la cušience religiose di dučh i popuj il stamp de mentalitât, de civiltât, da l’art latine al è il pericol di viodi a naši cualchi Lutar ogni volte che un popul al si svee e al si vise di no jessi de čočhe di Rome.

Ce ch’al à passât il Friûl in chel secul ch’al va dal colp di Stât di Odoaker fintremai ai tims di Gisulf (476-588) no si pò dî cun precision, se no si vûl lavorâ cu la fantasie: chês počhis informazions che si puedin riĝhavâ des memoriis di chê volte, si riferišin nome ai fats dai patriarčhis o a lis cuistions dai “Tre Čhapituj”.

LA DOMINAZION LANGOBARDE

Cu la vignude dai Langobards, a scomence un'altre pàgine de storie dal Friûl, dute disferente di ce che si lei par solit sui libris di scuele.

Chej ch'a rivarin chenti te Vierte dal 568 no jerin salvadis vignûts fûr dai boscs: unevore di lôr a jerin stâts in Italie a batisi cuintri dai Bizantins, donghe dai Gotics, e a cognoševin benon il paîs e lis usancis. Fintremai in chel an a jerin stâts in Ongharie e te Basse Austrie indulà ch'a vevin vincûts e pleâts i Gepids; cul imperadôr di orient a jerin in lighe. Par ce reson che le vedin rote no si sa; si sa che ai prins di Avrîl dal 568 a rivarin a Cividât e li il lôr re Albuin al stabili come duche Gisulf e lu lassà cunt'un trop des miôr "faris" e des miôr çhavalis ch'a vevin daûrsi. Dal Friûl a sçhamparin chej pôs Latins ch'a jerin anchemò culi o ch'a jerin tornâts cui Bizantins; e il vescul Paulin di Acuilee si ritirà a Grau cun dut ce ch'al veve di plui valôr.

La ondade dai Langobards a passà fûr drete viers l'Italie e no si sa che culi a vedin fats malans. Il Ducât dal Friûl al restà, in pratiche, come un Stât independent: al jere masse lontan de capitâl dai Langobards par sintî l'autoritât dal re; cence contâ che duçh i ducâts le sintivin pôc e che cualchi volte nol jere nissun re.

Al pò stâj che, daspò muart Albuin, sot dal re Clefi e in chej agns che i Langobards no verin re, anche in Friûl a sedin stâts netâts dal dut i vanzums de romanitât: sigûr che tai doi secuj de dominazion dai Langobards al scomparì dut chel tant, o chel pôc, ch'al restave anchemò dai timps de paronance di Rome.

Acuilee a fo bandonade dal dut. La Glesie a restà dividude in doi tocs, cunt'un patriarçe a Grau e un a Cormons e po a Cividât:

cun chel di Grau, ch'al jere tornât in union cun Rome, a restavin i vescuj istrians e litoranis fedêj ai Bizantîns; cun chel di Cormons, ch'al jere šismatic parviè de cuistion dai "Tre Čhapiuj", a stevin i vescuj sogets ai Langobards. La division in doi patriarčhâts a durà anče daspò ch'a fo fate la pàs tra i catolics e i šismatics.

Il puest di Acuilee romane al fo čhapât di Cividât langobard: une gnove prosperitât, un gnûv sflandôr e une gnove art a čhapà pîd e si svilupà te capitâl dal Ducât. Gisulf, Grasulf, Lôv, Wetarith, Rothwald, Pemon, Ratchis, Aistolf a forin duchis dal Friûl e personalitâts di prin plan te storie dal Langobards: cualchidun di lôr (Ratchis, Aistolf) al diventà anče re di chel popul.

Si puedin viodi lis testimonieancis di cheste grandece tal Museu di Cividât ch'al à la plui larghe e innomenade ricolte di memoriis e di relicuis langobardis.

I SCLÂVS

I Langobards a jerin rivâts (cui sa dontri) te Panonie e tal Noric in companie dai Avarics e cun lôr a vevin vinçûts i Gepids. Cuanche s'inviarin cul re Albuin par vignî in Italie, a lassarin daûr lis spalis i Avarics ch' a jerin in lighe cun lôr. Meşedâts cun chesçh si čhatavin a jessi unevore di trops di Sclâvs: nanche di chesçh no si capiş un dret d'indulà ch'a fossin vignûts: salacôr i Avarics ju vevin čhatâts su la lôr strade e ju vevin strişinâts daûrsi.

Co si forin sistemâts, Langobards in Italie e Avarics dilà des monts, al pâr che juste su lis monts de Basse Carintie e dal Cragh, al ven a jessi tal Čhanâl de Drau, su la Basse Gail e su la Mûr si sedin implantâts chesçh trops di Sclâvs. Vadi che ur fo lassade chê faşe di teritori parcè ch'al jere disabitât e parcè ch'al pareve plui salvadi, mentri che Avarics e Langobards si čhatavin plui ben tes planuris.

I Sclâvs, par tant ch'al pâr, a restavin ančhemò sot la paronance dai Avarics.

Sul finî dal 500 i Sclâvs, di une bande si urtavin cul duce di Baviere, di chê altre a mostravin intenzion di disbassâsi jù in te Dalmazie. In chej agns a devin jessi rivâts anche te nestre region, ce par travers da l'Istrie, ce pes monts de region Julie. L'alt čhanâl dal Lusinč al fo ocupât prin di dut; pôc daspò anche chel dal Nadison fin al point di San Cuarin e no si pò dî se i Sclâvs a sedin rivâts in chê volte anche parsore di Tarcint e tal čhanâl dal Fiêr indulà che, dal sigûr, a jerin cualchi pôc plui tard.

La *Historia Langobardorum* di Pauli Zaul a fevele dispès dai Sclâvs e des lôr impresis cuintri dai Langobards dal Friûl, scomençand dai timps dal re Grimuald (seconde metât dal 600) fintremai ai timps dal re Ratchis (al ven a jessi dibot un secul).

Al fo un Langobard, Arnefrîd, che par gole di diventâ duce dal Friûl al domandà jutori ai Sclâvs, e al fo copât in batae a Nimis: daspò d'in chê volte, tes barufis tra Langobards par cuestions di sucessions tal ducât, a vegnin fûr ogni tant anche i Sclâvs.

A son dunche dibot cutuardis secuj che su lis monts a soreli jevât de Furlanîe a plantarin lis lôr tindis chesçh "slovens" ch'a doprin anchemò un lengaġ plui vicin dal sclâv originari che no la stesse lenghe uficiâl, anche se, par fuarce, cualchi tiermin o costrut furlan un pôc a la volte al è penetrât.

In timp de dominazion langobarde e dal ducât dal Friûl, popolazions sclavis (vindis) s'implantarin anche tal çhanâl dal Fiêr come che si capiș dai nons dai paîs e dai sîts, scomençant di Mueč (par antîg Mosniz), a Racolane, Dogne, Patoc, Studene etec.

Anche chestis localitâts e àn di sei stadis dibot disabitadis prin ch'a rivassin i Sclâvs; ma plui tard la corentie di int, mæssime marçhadants, ch'a passave sù o jù pal çhanâl, vignind dal Friûl o de Carintie a finì cul lassâ il so stamp in chej paîs; e di Sclâvs a restà e anchemò a reste juste la semence tal çanton rimît de Resie, sot la mont Čhanine.

GRAU

Grau a jè l'uniche ìsule abitate de region furlane, e no jè furlane ni pôc ni trop; e si ten in bon di no jessi.

Ch'a vedi vût cualchi abitant prin dal 400 al pò anče stâj, ma nol risulte. Facil che lis primis staipis di palût a sedin stadis fatis a Grau in chê volte ch'al rivà Atile a sdrumâ Acuilee. E no duçh chej siôrs acuilejês ch'a jerin sčhampâts lajù, a tornarin indaûr daspò passât il burlaç: putròs di lôr no vevin plui čhase te citât e s'e faserin su l'ìsule.

Ma il gruès al rivà là cuanche Acuilee a colà tes mans dai Langobards. Si pò crodi che i prins a puartâ la pielate al sigûr a sedin stâts i plui siôrs, i parons latins, come simpri, cun dut il patriarče Paulin ch'al rivà adore di puartâsi daûr il tesaur de sô glesie. E chej no tornarin. In pôc timp un'altre citât, cui siei palaçs e lis sôs glesiis, a comparì su lis barenis: si tratave di siôrs!

La cuistion dai “Tre Čhapituj” a finì cul dividi il Patriarčhât: in Acuilee (o a Cividât) un patriarče šismatic favorît dal Langobards; a Grau un patriarče unît sot de protezion dai Bizantins. Cussì lis dôs citâts a deventarin antagonistis: une “civîl” e une “barbariche”. E la sbregadure no fo mai plui cuside. Intant che Acuilee a colave a flics, Grau al creševe d'impuartance e di autoritât: a jere la prime des ìsulis dal litorâl adriatic ch'a levin popolansi sot de dominazion bizantine. Ma la fieste no durà a lung. Grau, našût, si pò dî, des maseriis di Acuilee al jere destinât a fâsi scolâ di sang de furbarie di Vignesie.

Tra la prepotence dai patriarčhis todescs di Acuilee ch'a volevin fâsi parons e la politiche fine dai dôs di Vignesie, che le čharinavin par tignîle buine, l'ìsule a šielgè Vignesie. Cussì, par

secuj, intant che la Furlanìe a fo une code dal mond germanic, Grau si tignì in bon di sei une ponte dal mond latìn.

Al pierdè dut un pôc a la volte; al restà in man di patriarčhis natîvs di Vignesie che lu governarin stand a Vignesie; al passà sot dai conts nomenâts di Vignesie che no lu judavin in nuje e che no lu difindevin di nissun assalt; al sapuartà čharestiis, epidemiis e incursions; si ridusè te plui nere miserie, di no podê nanče justâ il cuviert dal palač dal cont: ma di tornâ a tacâsi al so čoc furlan nol fo mai câs.

Cussì, vîtime de sô stupide fedeltât a cui che in premi lu disvuedave di dut, si lassà puartâ vie anče la sede patriarčhâl e daspò nol fo nuje plui che un grop di čhasis discrodeadis, di tamossis tiessudis di čhanusse, e un popul di pesčhadôrs danâts a strušiâ la vite ta l'aghe e tal pantan e a murî di stents prin da l'ore.

J restà la braure di clamâsi mari di Vignesie e di fevelâ un lengaĝ disferent di chel dai “barbars” di tiereferme.

CIVIDÂT

La grande ore di Cividât a fo tai ultins agns de dominazion langobarde. “Forum Julii” no jere stade une grande citât: ce ch’al fo rincurât sghavand il teren e che cumò si čhate tal Museu, al lasse capî che la “colonie” romane a veve di sei formade di pùare int: salacôr dome lis fameis dai soldâts ch’a jerin di presidi. E chês, cul rivâ dal Langobards, a saran scomparidis: sčhampadis o sčhafojadis.

A conte la liende che il re Albuin, rivât daûr di Cividât, si tirà parsore di une mont a studiâ lis pozitions. Par chê strade ch’al jere vignût lui, a podevin vignî dentri altris di lôr: i Avarics, metìn a dî. E cussì, par vê lis spalîs siguris, Albuin al stabilì in Friûl il prin ducât e a Cividât la capitâl.

I Romans di Acuilee a sčhamparin a Grau, chej di Concuardie a Čhauris; Ğui, tal čhanâl di San Pieri, restade sierade la strade dal mont di Crôs, al fo nome un sît bandonât, cence impuartance, e anče il so vescul al vignì a stabilîsi a Cividât.

Cul prin duce, Gisulf, si fermarin te gnove capitâl personalitâts e fameis des plui in viste e il ducât furlan al passà di man in man a personis di valôr.

Passade la brute ore da l’invasion avariche (cuanch’al fo copât Gisulf), so fî Grimuald, ch’al jere rivât adore di salvâsi, al diventà re dai Langobards e al tornà a meti in man di chej de sô famee il ducât.

Te prime mitât dal Sietcent, al timp dal re Liutbrand, anče il patriarče di Acuilee, Calist, che si čhatave a Cormons, al vignì a stabilîsi a Cividât, parand vie il vescul di Ğui. In chê volte al jere duce Pemon: cun lui e cui siei fîs Ratchis e Aistolf ch’a forin un daûr di chel altri, duchis dal Friûl e rês dal Langobards, Cividât al diventà ančemò plui impuartant e al fo ornât di monuments e di

òparis d'art ch'a restin anchemò lis plui bielìs di chel timp e di chel popul: baste čhalâ ce ch'al è tal Museu, e il batisteri di Calist e l'altâr di Ratchis che cumò a son tal Dom.

Langobard de čoče di Gisulf al fo Pauli Zaul di Warnefrît (Paulus Diaconus), langobard al fo il patriarče Sigualt, salacôr de čoče dal re Grimuald, e Sant Anselm, cugnât dal re Aistolf e, vadi, anče il patriarče San Paulin.

Ma cheste a fo la ultime sflameade de potence langobarde. Aistolf e Desideri si urtarin cui papis e chesčh a clamarin di jutori il re dai Francs, Carli il Grand. Dal 773 al rivà re Carli, al čhapà Pavie di Milan e po Verone, al fasè presonîr il re Desideri e si proclamà lui re dai Langobards.

Il duce dal Friûl, Rotgaut, in chê volte si pleà cence fâ nissune resitence e al restà tal so puest sot la paronance di Carli. Il gambiament di parons al jere ģa fat cence consequencis di nissune fate pai Furlans. I Langobards si jerin aromai dučh mešedâts cui antîcs abitants dal Friûl e a formavin un sôl popul. Il re Carli nol veve mudât nissun ordenament.

Ma il duce Rotgaut no si tignì apajât di vê molât in chê maniere denant di Carli, e, in convigne cun so missêr Stabilin di Trevîs e vadi anče cui duchis Arichis di Benevent e Ildebrand di Spolêt, apene partît Carli da l'Italie pe vuere di Sassonie, al pensà di rivielâsi.

Il patriarče bizantin di Grau, Ğuan, savude la čhosse, j spià dut al pape Andrian, e il pape al visà Carli. Cussì tal 776, Carli al tornà jù e, daspò di un tremend combatiment dulà che Rotgaut al restà copât, al čhapà Trevîs e Cividât e al fasè un mačalizi di chej Langobards che si jerin rivielâts. Altris in' mandà vie lontans, altris in' metè in preson e ur čholè dut ce ch'a vevin. Ma nol mudà nuje

tal ordenament dal ducât: nome che tal puest di Rotgaut al metè un dai siei umign, Masseli.

E par un pôs di agns il ducât furlan al restà cussì, sot dai Frans. Cividât al mudà il non vieri di “Forum Julii” in chel di “Civitas Austrie”.

Muart il patriarče Sigualt, Carli al mandà chenti San Paulin ch'al jere so amì e ch'al vignì di triste voe parcè che j plaseve di stâ cui umign studiâts che il re Carli al veve tirâts donghe d'ogni dontri.

BERENGARI L'UNITARI

La ore nere dal Friûl a capità juste sot dai Francs, daspò muart Carli il Grand. Cun chest imperadôr, cul patriarče Paulin e cul duce Everard al pâr che lis robis si fossin inviadis avonde ben. I malans a scomençarin cun Berengari, second fi di chest Everard, ch'al diventà duce e margrâv dal Friûl dal 875. (Tai documents al è clamât tant “marchio” che “dux” e no si pò dî se, in chest timp, la disference tra il titul langobard e il titul francon a compuartàs disferencis di jurisdizion).

Berengari, cun dutis lis buinis e tristis vinturis che j capitarin, al durà un pieç a lung - magari cussì no - dibot cincuant'agns (875-924). Cu la sô brame di unî dute l'Italie sot la sô paronance, cu la sô gole di diventâ re d'Italie e imperadôr, cun dutis lis vueris ch'al fasè e lis vuàdulis ch'al çhapà, al trascurà simpri duçh i interès dal so ducât, anzit ju sacrificà tantis voltis a lis sôs masse grandis ambizions.

I scritôrs de storie d'Italie lu laudin unevore pal so sfuarç unitari: noaltris furlans o scugnìn ricognoši in Berengari la colpe di une des plui spaventosis calamitâts de nestre tiere.

Daspò vinçhecutri agns di cuistions e di balfueris di ogni fate cui siei cusìns o barbis - rês e imperadôrs di France o di Germanie o golôs, come lui, di diventâ - l'ultin an di chel secul si çhatà denant di une sdrume spropositade di Onghars (la int plui salvadie e besteâl che mai a sedi passade par ca) ch'a vignivin de Panonie e ch'a rivarin fintremai a Pavie di Milan.

Berengari nol rivà a fermâju e co ju tacà, che ġa dibessôj a tornavin indaûr çhamâts di robarie, lis çhapà fin sul vuès. Daspò di

chel an a tornarin plui voltis, cence che mai Berengari ur tajàs il pas, anzit cualchi volte clamâts di lui, pes sôs bielis impresis.

Deventât imperadôr provisorientri dal 915, lui no si dè nissun pinsîr dal Friûl e lu lassà in man a siei partesans, bogns di nuje, che plui tard lu tradirin, ma ch'a lassarin cori pe nestre tiere lis mandris dai Onġhars, ogni volte che ur saltà il gri di vignî.

No si sa un dret di cetantis voltis che chesçh çhastîs di Diu si struçararin ca in Friûl: al pâr ch'a usassin a spietâ, tra une incursion e chê altre, il timp ch'al bastave par che la int ur ves preparât alc altri ce robâ. A vignivin pe solite strade di soreli jevât; a passavin fûr par mieġ de Basse, dulà ch'a jè ançhemò la Stradalte che, daspò di chê volte, a fo clamade Onġharesçe (strata Ungarorum) e dute la campagne disore e disot par un gran toc a çhapà il non di “vastata Ungarorum”.

Ma si pò crodi che dute la planure furlane a sedi stade, ce pôc ce trop, dispueade e dispopolade di chês sbilfis e che mai, in tançh secuj di invasions e devastazions ch'a sopressarin il Friûl - nançhe cun Atile - la nestre region no vedi presentât un spettacul di desolament compagn.

Si podarès, tant che si vûl, dividi la storie furlane in dôs parts: prin dai Onġhars e daspò dai Onġhars; parcè che, di dut ce ch'al jere stât fat prin, nol restà altri che i vanzums ġa sapulîts sot tiere, che i Onġhars no vevin timp di lâ a sgarfâ. A fo une fortune pai paîs e pe int da l'Alte, di çhatâsi a jessi pùars e fûr di man: cussì a forin sparagnâts ançhe di cheste disgracie, midiant che i invasôrs no vevin timp di pierdi dulà ch'al jere pôc ce robâ e i parons a podevin resisti.

Nome su la mitât di chel secul l'imperadôr Oton al rivà adore di rompi lis cuestis ai Onġhars e di fermâ la tragiche usance ch'a vevin çhapade.

FORMAZION DAL PATRIARĀHĀT

Daspò de tampieste dal Onġhars il Friûl, dibot par cinc secuj, al reste distacât dal ambient talian e al va a fâ part dal ream germanic. Si capiș che, restand geografichementri dicà des monts, al restà anġhe leât cul mond culturâl latìn plui che no lis regions dilà de Donàu, ma la sô vite politiche a fo chê di un Stât feudâl todesc.

Cheste situazion a scomence a formâsi sot dal imperadôr Oton I. Il marchesât furlan, ridusût in maseriis e unît cu la marġhe di Verone, al passe tes mans di Indrì di Baviere; e po il ducât de Carintie, cul Crag, il Stajar, l'Istrie e il Friûl, al ven distacât de Baviere. Cussì l'herzog di Carintie al comande anġhe de marġhe veronese e de Furlanìe, indulà ch'al comparìs, sî e no, cualchi volte un cont che nol conte nuje. Chel ch'al conte simpri plui denant dal imperadôr al è il patriarġhe di Acuilee.

Al veve ġa tacât Berengari a fâ cualchi donazion di terens al patriarġhe Fidri (900, 904); ma la prime invistidure d'impuartance a fo chê dal imperadôr Oton I, che dal 967 al meteve tes mans dal patriarġhe Roduald dut il teritori furlan tra la Stradalte e il mâr, di Cervignan fintremai a la Livence, cence contâ altris concessions ca e là.

Unevore di donazions di terens e paîs intîrs al fasè anġhe Oton II, tant a Roduald che a Ģuan, e anġhemò di plu Oton III, màssime des bandis di Plez, Tulmìn, Gurize e sul Vipau.

Al ven a jessi che, intôr dal an 1000, la jurisdizion dal cont dal Friûl a jere dute semenade di possessions dal patriarġhe e chestis a deventarin simpri plui largġhis e numerosis, in maniere che la paronance dal cont, prin rote di tantis ìsulis di domini patriarġhâl, a

finì, un pôc a la volte, cul ridusisi in cualchi ìsule pierdude tal teritori dependent dal patriarče.

Si sa che cheste a fo pardut la pôlitiche dai tre Otons: meti lis jurisdizions feudâls tes mans di umign de Glesie par no ch'a diventassin ereditariis tes fameis dai conts e par podê tignî leâts cun cheste çhavece vescuĵ e abâts.

In chest timp une larghe faše di teritori disore e disot de Stradalte a scomence a popolâsi di paisuts ch'e àn un non sclâv: Guriz, Guricize, Gradisče, Gradisčhute, Revidisče, Stracis, Bielgrâd, Sante Mârize, Sante Marizute, Vuirc, Lestice, Čumpiče, Sclaunic, Samardenče e vie indenant. Cheste a jere la part de Furlanie ch'a veve patît di plui parvie dai Onĝhars: si viôd che in chej sîts al veve di sei restât un disiert e che i Sclâvs des monts a soreli jevât, o invidâts o lassâts vignî dai patriarčhis, a capitarin a tornâlu a popolâ. E chesčh paîs, par ordin ch'a naševin, a passavin sot de jurisdizion dai stes patriarčhis (diplome di Oton III al patriarče Ğuan, 1001).

Fintremai al timp dal patriarče Popon no si pò dî cun sigurece di ce nature e cun ce estension ch'a fos cheste jurisdizion: se al cont j restàs ančhemò cualchi derît o nuje. Ma cun Popon (1019-1042) la cuistion si defîniš, parcè che dal 1027 l'imperadôr Conrâd II al declarà che i paîs, i čhisčhej, i terens e lis personis ch'a jerin sot dal patriarče no dipindevin in nissune maniere ni di conts ni di marchês ni di funzionaris imperiâĵ: al ven a jessi che il patriarče al jere feudatari di prin grâd, dipindind nome e diretementi dal imperadôr; cun di plui il stes Conrâd j deve a Popon il derît di bati monede, ch'al vignive a significâ une vere sovranitât.

Cussì si pò dî che il principât temporâl dai patriarčhis di Acuilee al jere našût.

IL FRIÛL TODESC

In doi secuj di dominazion langobarde la coloridure etniche e culturâl de Furlanîe a veve bielgâ çhapade une tinte germaniche che, sot dai Francs e sot dai Berengaris, no si pò dî ch'a fos lade smamide. Daspò des devastazions dai Onghars, la vite de nestre region a tornà un pôc a la volte a resurî, ma di chês stessis lidrîs, cun chel caratar istès e par man di personis di chê stesse çoçhe.

Al sarès diband di sfuarçâ la storie par tignî leât il Friûl cul mond talian dal X al XIII secul: disferent l'ordenament feudâl sot dai patriarçhis, disferent il svilup dai Cumons e dal Parlament, disferentis lis relazions comerciâls e ançhe chel fregul di culture ch'a podè sverdeâ in timps cussì crûds e tormentâts.

A partî da l'ultime passade dai Onghars (951) fintremai cuanch'al rivà chenti Grivôr di Montlunghe (1252), a governarin il Friûl disesiet o disevot patriarçhis che - ģhavand Gerard di Premariâs (1121-1129) e, salacôr, Ģuan (984-1019), che no si sa dontri ch'al jere - a forin duçh todescs; di solit parinçh di rês e imperadôrs o lôr cancelîrs o capelans o confidents, o ch'a ješivin di potentis fameis feudâls de Germanie.

Si capiš che, vignind chenti, si menavin daûr int di lôr fidance, màssime in chej timps che i tradiments di ogni fate a jerin cussì usuâj; e chês jurisdizions feudâls, ch'a dipindevin di lôr, lis metevin tes mans di personis siguris de lôr parintât o di lôr cognošince; e, jessind leâts cussì a strent cui imperadôrs, a restavin dal lôr partît ançhe cuanch'a naševe cualchi cuestion cui papis.

La cort acuilejese a jere dunçhe formade, in buine misure, di elements todescs; la nobiltât ministeriâl, i ufiziâj, i nodârs a vignivin dai paîs dilà des monts e tançh di lôr si stabilivin culi par simpri. In

tre secuj cheste filtrazion a veve, par fuarce, di lassâ il so stamp avonde indentri te vite de region. Se la Germanie a ves vude, in chê volte, une sô culture ben individuade, il Friûl al varès scugnût glotile.

Ma la culture latine, mæssime tra i umign di glesie, a jere culture universâl e cussì i tre secuj dal patriarçhât todesc no portarin une vere germanizazion dal Friûl. Paraltri la lenghe todesche (antîc-alt-todesc) a fo, donghe dal latìn, la lenghe di dutis lis personis di cualchi istruzion, la lenghe des relacions cui sorestants e la lenghe di cualchi document e di cualchi scriture.

Un çhaluni di Cividât, Bernardin di Circlarie, al è l'autôr di un dai plui antîcs e gruès libris in viers todescs: il “Velisher Gast” (p.f. “il forest talian”); il plui brâv e innomenât dai “Minnesanger” (çhantôrs d’amôr), ch’al fo Walter von der Vogelweide, al passà cualchi timp in Friûl; un altri di chesçh poetis (un fregul toçhât di çurviel) Ulrì di Lichtenstein, al conte int’un libri (tal “Wrouwendienst”, “siervizi des sioris”) dutis lis bravadis fatis atôr pal Friûl tanzonand cui miôr cavalîrs di chenti.

Unevore di peraulis di stamp tedesc a jentrarin in chê volte te lenghe furlane e, in part, si lis dopre ançhemò (*vuaite, paise, vignarûl, licôv, grap, cramar, bearç, gatar, glove, seneôs* etec.), altris a son ladis dismenteadis, come *sgaravât* (mâscare), *sloiar* (vêl), *seiter* (tace) e vie indenant.

I nons dai paîs, tes çhartis di chej timps, a son des voltis voltâts par todesc (*Gutenbrunn* = Fontanebuine) o alterâts in maniere di someâ peraulis todeschis (*Weiden* = Udin, *Klausen* = Scluse, *Klemaun* = Glemone, *Rewin* = Ruvigne, *Portenau* = Pordenon, etec.), o ch’a son mudâts di plante fûr (*Schonfeld* = Tumieç, *Peitscheldorf* = Vençon, *Osteric* = Cividât), o ch’a son našûts in chel

timp cunt'un non todesc (*Spilimberg, Solimberg, Richinvelde, Tamau* etec.).

Su lis primis faldis des monts a forin costruîts čhisčhej o fortificaziuns ch'a puartavin il non di čhisčhelans todescs: *Aissenstein, Grosseberg, Rabenstein, Pramperg, Perchtenstein, Wrusberg, Sofimberg, Haumburg* e tanč altris che, se si fasès une mape topografiche cu la toponomàstiche dal 1200, si podarès crodi di vê sot dai vôi une provincie da l'Austrie o de Germanie.

Anče la int a puartave dispès nons e sorenons todescs.

PATRIARČHIS E CUMONS

Cui ch'al fevele o ch'al scrîv sul cont dal Friûl ta l'Etât di mieĝ, al scuen dî mâl dal guviêr dai patriarčhis par podê daspò justificâ la dominazion di Vignesie che lu struçhà.

A vignarà la volte ch'o spiegarin ce benefizis che Vignesie a puartà te nestre tiere: intant, in mančance di miei, Vignesie a jè l'Italie e alore si capiš dut: a va tignude sù anče a fuarce di sfločhis!

In Realtât il Stât patriarčhâl, tanche ogni unitât feudâl, al fo savorât di barufis e di vuerucis che tra i siôrs parons o sotparons no mančharin mai: la pùare int dai paîs a mudave paron ogni altre dì e ogni gambiament al puartave cualchi distruzion e cualchi vîtime e nissun vantaĝ pes popolazions.

Ma cheste, magari cussì no, a fo la condizion di dute l'Europe in chej timps, e si pò anče dî che la pluipart di chês altris regions a fo, salacôr, plui tormentade de nestre.

Ce vite jerie chê dai cumons de Lombardie che si sbregavin un cul altri? Ce vite jerie chê dal Venit cun Ezelin o cui siôrs di Čhamin o cun chej de Sčhale di Verone? E la Toscane al timp di Dant e prin e daspò, ce pâs e ce prosperitât àe podût ĝholdi? Al baste dî che centenârs e centenârs di Toscons a sčhamparin in Friûl, juste sot dai patriarčhis, parcè che chenti, dal mâl e dal malan, si podeve almancul tirâ flât. E no stin a discori di Rome o de Sicilie o di chej altris paîs, tant dicà che dilà des monts.

Tiradis lis sumis, il Stat furlan, par cuatri secuj, al patì mancunl batiduris de pluipart di chej altris e la disconcuardie a regnà plui che altri tra i parons e no tra lis popolazions. Lis memoriis che nus son restadis di chej timps a fevelin di lotis e di svindìcs; ma si sa che,

par dut il mond, crònichis e documents a tratin dome di chês robis parcè che la vite ordenarie de int, il so lavôr, lis sôs ġhondis e i siei dolôrs, par solit, no interessin a la storie: la storie a jè storie dai potents, dai parons e des lôr carognadis.

Il fat al è chest, che in chel timp il Friûl sdrumât e dispopolât dai Onġhars al tornà a metisi in pîs e ungrumon di paîs a našerin juste in chê volte.

Un'altre robute a mertarès precisade, in chest pont. A scuele nus àn insegnade patriotichementri la storie dai cumons talians e de Lighe lombarde e de distruzion di Milan par man di Fidri Barberosse e de batae di Legnan; ma nissun, dal sigûr, no nus à contât che i nestrîs vons furlans a forin simpri de bande dal imperadôr cuintri i cumons talians e che, atôr des muris di Milan assediât tal 1161, a jerin cul Barberosse anche i soldâts dal nestri patriarče Pilirin; e che se Vodari al clopà un pôc dicà e un pôc dilà, Godfrîd, Volfgar e Pertold di Andechs a forin simpri cui imperadôrs de çhase di Svevie.

E nol è di dî che la politiche imperialiste dai patriarçhis a fos contrarie al pinsîr dal popul furlan: parcè che, sàbide sante dal 1168, cuanche il patriarče Vodari, te basiliche di Acuilee, al fasè chantâ la orazion pal pape Lissandri III ch'al jere il grand inimî dal Barberosse, dute la int ch'a jere vignude a funzion, a tacà a protestâ, a sberghelâ e po a sçhampà fûr de glesie lassand implante il patriarče.

Cumò nol è il câs di tratâ di cui ch'al veve reson o tuart in chestis barufis tra papis e imperadôrs e tra principis ghibelîns e cumons papalîns: ma mestris e professôrs e scritôrs e predichadôrs a varessin di savê che lis vitoriis - o miegis vitoriis - dai cumons talians cuintri di Fidri I e di Fidri II no son une nestre glorie; e nol è onest di falsâ la veretât par meti i Furlans int'un fašut cu lis lighis

comunâls (che, dal rest, no scombatevin par spirt nazionâl, ma nome pai lôr interès positîvs).

IL PARLAMENT

L'ordenament politic dal Friûl tra il Dusinte e il Tresinte al cuistà une sô forme ch'a sierv di maravee ai storicis nostrans (e a chej talians, chês raris voltis che ur capite di interessâsi des nestris facendis). Ma s'a vessin la complasince di slunghâ une voglade su la storie dai Stâts feudâj de Germanie, vadì che lis lôr maraveis si sfantaressin.

Al è naturâl che in tre secuj di guviêr dai patriarçhis todescs, la nestre "Patrie dal Friûl" - juste in chês volte a scomençà a clamâsi cussì - a vedi çhapât il stamp di un principât germanic.

Lis dôs istituzions plui disferentis dai ordenaments talians, sot dal guviêr dai patriarçhis, a forin lis Comunitâts e il Parlament.

Lis Comunitâts dal Friûl no àn nuje ce fâ cui Cumons de Lombardie, dal Venit, de Toscane, ni parviè di cemûd ch'a son našudis, ni parviè di cemûd che si governavin. No si formarin dibessolis a dispiet dal patriarçhe lôr princip; no forin, par lôr nature, in contrast cu la sô autoritât; no ciririn mai di vê une indipendence cussì larghe come i Cumons talians. Nol jere nanche possibil che l'ordenament comunâl talian, a forme republicane, al s'implantàs chenti indulà che i paîs plui gruès, come Cividât, Glemone, San Vît o Sacîl, a podevin vê, rive o no rive, tremil ànimis.

A forin i patriarçhis stes a dâur un ordenament comunâl sul finî dal secul XII; e chest ordenament al fo di chês siorte istesse di diviersis citâts da l'alte Germanie. A vevin i lôr conseis, a fasevin lis lôr leġs e i lôr statûts, a šielgevin i procuradôrs, i massârs, i çhamerârs e i funzionaris, a ministravin la justizie sui lôr sugets; ma lis cuistions plui impuartantis e d'interès generâl no lis tratavin

dibessolis, lis tratavin mediant dai lôr deputâts tal Parlament de Patrie; e in ognidune al jere un rapresentant dal patriarče.

Anče il Parlament al jere formât sul stamp des sambleis feudâls de Germanie. No si pò dî cun precision cuanch'al scomençà a funzionâ, ni cemûd ch'al funzionave tal prin. In Italie no si čhate nissun esempi di cheste fate. Facilmentri i patriarčhis, ančemò tal XI secul, a varan tacât a clamâ donghe i lôr feudataris ogni volte ch'al jere par ajar alc di gruès par sintî la lôr opinion e par intindisi sul cont de "tae" feudâl (ch'al ven a jessi sul numar dai soldâts e dai čhavaj ch'a podevin mandâ tal esercit patriarčhâl) e su la division dai contribûts in monede ch'a vignivin a coventâ in câs di vueris o di altris čhossis impuartantis.

Si tratave di une samblee consultive, dunče, come ch'and' jere altris dilà des monts e come ch'al jere, in chê volte, anče il Parlament anglês.

Cu la formazion des Comunitâts, anče i deputâts di chestis a jentrarin a fâ part dal Parlament; e alore la samblee a cuistà un andament plui regulâr e une plui alte impuartance sul guviêr de Patrie. No veve ančemò un sît stabil pes adunancis ni une règule pes convocazions: il patriarče le clamave adun ogni volte ch'al veve dibisugne d'intindisi.

Ma il Parlament, un pôc a la volte, al diventà anče un tribunâl ch'al tratave lis causis tra il patriarče e i siei feudataris ministeriâj, lis ribelions e i delits cuintri de pàs dal Stât; al tratave in apel lis sentencis de curie patriarčhâl in materie di derîts feudâj e, in tierce instance, lis sentencis dai podestâts, čhastalds o judis de Comunitâts: fintremai che l'autoritât dal Parlament a rivà sun dutis lis čhossis ch'a dipindevin dal podè statâl: tassis, milizie, difese, foritficzions, prestazions di ogni fate; fin a controlâ il stes patriarče e meti adun un vêr codis di leğs pe Patrie - lis Constituzions de Patrie dal Friûl -

a tratâ cun princips e Stâts foresch, cence nanche dipindi dal patriarche.

Par fâle curte, il Friûl, tal secul XIV al rivà a vê un guviêr pôc o trop costituzionâl, come ch'a rivà a vêlu l'Anglie cu la "Magna charta libertatum".

In nissun sît di dute l'Italie nol esisteve, in chej timps, un Stât grand come il Friûl, ch'al ves vût un guviêr di cheste fate.

I PATRIARĀHIS TALIANIS

Daspò muart Pertold di Andechs, il Stât furlan al colà tes mans di patriarĀhis talians che lu governarin par otante agns seguitîvs: 1252-1332. ChesĀh a forin: Grivôr di Montlunghe di Ferentìn, Raimond de Tôr di Milan, Pieri Āhere di Ferentìn, Otobon dai Rovârs di Plasence, Gaston e Pajan de Tôr di Milan.

A forin tims turbids e tribulâts pai nestrîs paîs e pai Stâts confinants da l'Italie e de Germanie; e nol è possibil fâsi un judizi positîv e une stime sigure sul cont da l'òpare di chesĀh patriarĀhis. Ma, fossie o no fossie colpe lôr, il Stât patriarĀhâl che fintremai in chē volte, magari tra confusions e balfueriis di ogni fate, al jere lâs slarġhansi e saldansi, cun chesĀh governants al scomenĀà a disĀhadê, a sfaldâsi e a strengisi.

La politiche ghibeline dai patriarĀhis todescs, vuadagnand il favôr dai imperadôrs, j ġovà praticementri al Friûl ch'al creševe, dibot ogni an, di teritori e di concessions. La politiche papaline dai talians j fasè pierdi chest favôr cence nissun vantaġ de bande dai vuelfs. Cundiplui che i talians, mæssime i doi Turians, Raimond e Pajan, a doprarin lis fuarcis e lis risorsis dal Friûl par judâ i interes de lôr famee in Lombardie tes sôs vueris cuintri dai Visconts. La Curie papâl di Rome e di Avignon, sore de nòmine che ur deve, ur domandave une sume cussì gruesse che no rivavin mai adore di pajâle: e alore ur mandave filîpichis e suspensions. Cussì, tra lis spesis militârs pai interes de lôr Āhasade, i "siervizis" di pajâj a la Curie e i onoraris ai lôr viĀcharis, Āhapitanis generâj e altris lôr dipindints, a scugnivin, ogni altre dì, meti sù tassîs ai lôr ministeriâj e al popul; e istès no vevin mai avonde bêĀs.

Par tignîsi sù cuintri dal partît imperiâl ch'al veve simpri i siei fedêj tra la nobiltât furlane, chesĀh patriarĀhis a menavin daûr un

grum di gràmulis dai lôr paîs e ur metevin in man incarghis e ufizis tant di glesie che di guviêr causand une vere invasion ce di bassarûj ce di lombards, in Friûl. E cheste no fo la ultime cause des ribelions e des lighis de nobiltât cui nimîs dai patriarčhis.

Al scomence Grivôr di Montlunghe a menâ o a clamâ chenti une schirie di meridionâj de Campanie: ur consegnà in apalt doanis e tassis a Toscans, par tirâ fûr carantans; ur spalancà lis puartis de region ai talians par fâur un cuintripês ai todescs che si jerin, di un pieç in ca, implantâts chenti; al leà la Furlanîe ai interès dal partît papalìn da l'alte Italie; e tal so testament ur lassà dibot dute la sô robe ai amîs meridionâj.

Raimond de Tôr, cu la sô ande di ditadôr, al decretave di mudâ di puest un paison come Glemone e di metij non Milanraimond; ma in prâtiche, come vescul no 'n' combinà une di drete e come princip al imbastì une falope parsore l'altre; al implenà il Friûl di cusins e di nevôts, j cedè Vençon a Mainard di Carintie, al judà Gherard di Čhamìn ch'al veve nome gole di fâsi paron dal Friûl e al menà i Furlans a fâsi sbudielâ dai Visconts par tornâ a meti in pîs la sô famee a Milan.

Pieri Ğhere par mieĝ di so nevôt Niculau j cedè Sacîl a Gherard di Čhamìn (il "buon Gherardo", dissal Dante) e nol rivà adore di fâ di piês parvîe ch'al murî daspò doi agns di guviêr.

Otobon dai Rovârs nol fo un leon: cuanche Indrî di Gurize e Rizard di Čhamìn (il fi di Gherard) a devastavin il Friûl, lui al sčhampà di scuindon; al lassà che Vignesie j puartàs vie i derîts su lis citâts da l'Istrie e che Rizard al diventàs so čhapitani generâl. E anče come diplomatic, tal cirî di convinci chej di Bresse di Milan a viergij lis puartis al imperadôr Indrî VII, al fasè une fiçhace cence costrut.

Gaston de Tôr al colà di čhaval e al murì pe strade biel vignind in Friûl: ma al jere bielgà rivât adore di nomenâ so vičhari il fradi Rinald.

Pajan de Tôr, nevôt di Raimond e barbe di Gaston, al seguità l'esempi dal stes Raimond, menand i Furlans a batisi cuintri dai Visconts intant che i Todescs a devastavin il Friûl restât cence difese (1324): e il timp che lui al governà culì al fo salacôr il plui burasçhôs dal Patriarçhât pes disconcuardiis e pes vueris ch'a faserin tribulâ paîs e vilis in dute la Furlanìe.

Nol covente dî che il mert di vê intalianade la region, pai nestris storicis, al va parsore di dučh i malans causâts di chesçh patriarçhis.

LA SGRIFE DI VIGNESIE

Infintremai che i principâts feudâj da l'alte Italie si jerin tignûts pojâts daprûv dai imperadôrs, Vignesie a veve scugnût contentâsi di svuatarâ tes sôs aghis e di traficâ par mâr cun Bizantîns e cun Sarasîns. Cun lôr a veve fat afarons, a jere diventade siore, a veve taponât di marmul e di mosaics d'aur la fanghere de sô lagune, ma no veve vût ni armis ni soldâts ni pratiche par pitufâsi cu la feramente dai esercits todescs.

Anche il Patriarçhât nestri al jere stât sigûr di chê bande: juste su lis cuestis da l'Istrie, indulà che ai bastiments di Vignesie ur leve ben di podêsi pojâ, a jere stade cualchi barufe e, daspò des barufis, cualchi pat. I patriarçhis talians, masse lontans e masse indafarâts in altris facendis, no vevin bacilât trop di tignî dure chê striche di tiere clapigne, cence risorsis par lôr, e a vevin lassât che Vignesie a pojàs la sgrife dal so leon parsore.

Ma dal Tresinte l'imperi al jere in plene babilonie, il partît papalìn si slarghave fin sot des monts e i Talians a çhapavin pîd ogni dì plui anche des nestris bandis. Al jere il moment just par Vignesie di saltâ fûr dal so pantan e di meti la çate sul dûr. A scomençà cu lis tieris plui donghe spietand cun pazienze che j vignîs il dret di rivâ plui in ca.

Par fortune de Furlanìe, daspò di une file di patriarçhis che no varessin tignût dûr trop a lung, indi capitarin doi di chej dai comedons di fiêr: il francês Beltram di Saint-Geniés e il todesc Marcuard di Randeck. A forin i ultins doi umign di sest ch'a vedin governât il Friûl.

Beltram al rivà chenti vieli di etât ma no di spirt e, in vinçh agns ch'al durà anchemò, no si çhapà un moment di padìn. Al

mostrà chel istès calôr e chê istesse fuarce tal guviêr spirituâl e temporâl dal Patriarçhât: il pastorâl e la spade j stevin ben in man, cence diference. Cuintri di Vignesie e cuintri dal imperadôr Luduì di Baviere, cuintri dai siôrs de Sçhale parons di Verone e dai conts di Gurize e dai duchis di Carintie, cuintri di duçh i prepotents di fûr e di dentri si batè tanche un leon. Al governà il Friûl come sovràn independent, çhaland dome al interès de sô int; e cundut ch'al fo simpri dûr e sald te sô strade, daspò che i nimîs che lui al veve tantis voltis pestâts, a rivarin adore di sassinâlu sul plan de Richinvelde, i Furlans lu venerarin tanche un sant.

Marcuard di Randeck al jere crešût tai pastiçs de politiche ingredeose di Luduì di Baviere e di Carli IV di Lussimburg: al jere un omp che le saveve lunghe e ch'al veve navigât unevore tes aghis turbidis de diplomazie. Anche lui al tignì duris lis brevis dal guviêr, al si mostrà risolût cuintri la furbarie dai avversaris, ma simpri rispjetôs de autoritât dal Parlament furlan. Al fasè meti adun e al promulgà lis “Constituzions de Patrie dal Friûl” ch’a forin il nestri codis fintremai a la vignude di Napoleon. Al indivinà lis intenzions di Vignesie e al fo un dai plui çhalds fautôrs di chê leghe cuintri di jê che, tra il 1378 e il 1381, j fasè plui di une volte disbassâ il çhâv a la Reine dai mârs. Cun cheste vuere al rivà adore di tornâ a çhapâ Triest e antîcs derîts su l’Istrie.

Ma si pò dî ch’a fo l’ultime sflameade de nestre indipendence. Vignesie no j perdonà plui ai Furlans lis sgnèsulis çhapadis in chê vuere; e, apene muart il patriarçhe Marcuard, profitansi dai pastiçs našûts parvie di Filip d’Alancon (che j Furlans no volerin vêlu come patriarçhe comendatari) e parvie di Ğuan di Moravie (che nol savè çhapâju pal lôr viers) a tacà a furduçhâ sotvie cunt’una politiche paziente e sutile par disponisi a meti il Friûl sot la sô dominazion in maniere di no vê plui pôre di lui.

LA FIN DAL PATRIARĀHĀT

Par une corantine di agns, la politiche di Vignesie - si scuen dĭlu - a fo paziente e furbe. No 'ndi voleve tropis a ocupĀ il Friul in chĕ volte de vuere disastrose pal patriarĀhe d'Alancon (1381-1382) o sot dal guviĕr di Āuan di Moravie (1388-1394) o in altris ocasions; ma une azion direte di Vignesie a varĕs dal sigur dismots i scrupuj di Rome dal imperadĕr e lis gelosiis dai Visconts, dai Florentĭns, di Verone.

Il Friul al jere un dai unics StĀts gleseastics in Italie e un dai plui impuartants principĀts feudĀj: Rome e l'Imperi no lu varessin lassĀt restĀ tes mans di Vignesie cussĭ pes matis. Si pĕ crodi che la Serenĭssime a vedi pensĀt di spietĀ che il piruĉ madur al colĀs dibessĕl contentansi di dĀ, ogni tant, une sĉhassade al piruĉĀr.

I Savorgnans a forin la sĕ sgrife e i siei agents tal PatriarĀhĀt: Udin al jere, si pĕ dĭ, tes mans dai Savorgnans in chej moments burasĉĕs e al ubidĭ a lis diretivis ch'a vignivin di chĕ bande, in chel mentri che altris comunitĀts, come CividĀt, Glemone, Tumieĉ, a mostrarin di capĭ plui ben la situazion e di volĕ passĀ parsore di cualchi disference, tratansi di salvĀ l'indipendence dal Friul.

Cussĭ a passarin i agns tra vueris di ĉhisĉhelans e di comunitĀts pro o cuintri dai patriarĉhis e tra di lĕr, indulĀ che lis risorsis de region, la fuarce, la pazience de int a forin strassadis, lis tavielis devastadis, i ricolts lĀts malementri, putropis vilis o ĉhisĉhej brusĀts, unevore di int muarte, ogni riĉhece scomparide par man des masnadis di soldadats di vinture ch'a corevin ca e lĀ pe region.

Vignesie a cirive simpri di vĕ un arbitrĀt fra i contindints par imponi condizions daur dai siei plans, e Udin cui Savorgnans j tignivin man. Cussĭ, planc plancut, a faseve valĕ la sĕ autoritĀt e la

sô volontât in dutis lis nestrîs facendis. A tignî turbidis lis aghis a judavin anče i conts di Gurize e i Cararês di Padue.

Si rivà, tra balfueriis di ogni fate, fintremai al 1417. In chel moment la Glesie a jere dute sbregade parviè de Šisme occidentâl: a jerin tre papis e nissun capive cuâl ch'al jere chel just; il Concei di Constance al jere indafarât a disgredeâ il glimuč e nol veve timp di abadâ a rognis di altri genar.

Sismond di Lussimburg, re di Onĝharie, nol rivave adore di fâsi ricognoši imperadôr cuintri di so fradi Vincislau e di so cusin Jost, e al veve il so dafà parviè di une rivolte religiose in Moravie.

Patriarče di Acuilee al jere Luduì di Teck nomenât dal re Sismond ma no confermât ančemò di nissun pape: al veve cirût altris dôs voltis di diventâ patriarče e nol jere nanče predi. La sô politiche, cence direzion nete, cence intelligence, cence risolucion, a restà in sostance leade daprûv di Sismond che nol veve timp e ni mieĝ di sustignîlu avonde, imberdeât come ch'al jere in mil imbrois.

Vignesie a pensà ch'al fos rivât il moment bon par slunĝhâ la čate. Cu la scuse che il gnûv patriarče al jere in lighe cun Sismond e che Sismond al jere in vuere cun jê, a tacà l'invasion dal teritori patriarčhâl. No fo une imprese tant facil: i Furlans - Comunitâts e čhisčhelans - judâts a tratis dal cont di Ortemberg e di cualchi trop di Onĝharês, a tignirin dûr fintremai che ur vanzà flât. Il patriarče, sčhampât a cori daûr dal re par vê jutoris, ju lassà tai pastičs.

Cussì tra la Vierte e l'Istât dal 1420, a un a un, čhisčhej e paîs a scugnirin molâ. Ogni čhisčhelan e ogni Comunitât al tratà cun Vignesie par so cont: i čhisčhelans a domandarin il ricognošiment des lôr prerogativis, lis Comunitâts il mantigniment dai lôr statûts, il Parlament la conservazion dai siei derîts e regolaments. Vignesie a prometè dut, fasinsi pajâ grassis indenitâts di cui che nol voleve jessi sachiĝât dai siei soldâts.

Cul 3 di Otubar di chel an malandret, a colave la ultime resistance a Plêv di Čhadovri e la independence dal Friûl a finive daspò vot secuj e mieĝ di vite (578-1420).

I Furlans, obleâts a pleâsi, salacôr a pensavin che si tratàs di une burasche di passaĝ, come ch'indi vevin provadis tantis; invezit no čhatarin plui la fate di drečâsi: Vignesie ju tignì sot par plui di tre secuj e mieĝ e daspò si derin di volte altris parons.

LA DOMINANZA DI VIGNESIE

Parviè de lontanace dal patriarče e parviè de istesse nature dal ordenament feudâl de nestre region, la ocupazion dal Friûl par òpare di Vignesie a vignì stabilide mediant di tratativis particulârs cun ognidun dai čhisčhelans e ognidune des comunitâts, cence nissune convigne e nissun ricognošiment de bande dal princip-patriarče.

Ma rivand chenti, la Repùbliche di Vignesie a meteve lis mans sunt'una region dal dut disferent par ordenaments politics e ministratîvs, par condizions, tradizions e mentalitât, par composizion etniche e par lenghe: il Friûl nol veve nissune someance cu lis instituzions di caratar comunâl e oligarchic de Repùbliche, ni cul so mûd di vivi, ni cu la sô culture.

La costituzion dal Patriarçhât a jere suparjù chê dai principâts gleseastics de Germanie; il grâd di dipindince des vilis, des comunitâts, des čhastaldiis, dai čhisčhelans ministeriâj e di chej libars, denant dal patriarče, al jere pardu disferent e stabilît par mieç di invistiduris o di statûts o di costumancis speciâls par ogni câs.

No 'ndi voleve tropis a capî ce savoltament ch'al sarès našût in dute la vite dal Friûl, se Vignesie a ves volût conformâ l'ordenament de region cul so ordenament o cun chel di chej altris siei dominis di tiereferme.

Cussì la Serenissime no si risçhà a butâ dut par ajar, salacôr di pôre che un tâl at di fuarce j fasès diventâ plui intrigade la conservazion de sô conquiste: una grande sollevazion dai Furlans, judâts dal imperadôr, a jere simpri possibil. A pensà dunche di rivâ a la unificazion ministrative un pôc a la volte, par grâds. E par intant a lassà in pîs l'ordenament feudâl dal Friûl.

Ma par fâ chest tant - cun dute chê sustanziâl disference dal so guviêr - a fo obleade a constituî la region in entitât autonome stabilind chej ch'a vevin di jessi i siei rapuarts cui čhisčhelans e lis comunitâts ch'a mantignivin lis lôr juridizions, e no cu la popolazion che no veve nissune figure juridiche. In cheste maniere la nobiltât a conservave la sô preminence tal Parlament e chest al diventave un institût esecutîv dal gnûv guviêr: institût pôc sigûr e pôc disponût a ubidî parcè ch'al jere formât cun elements di čoče todesche, di tradizions imperiâls, di mentalitât contrarie al spirt dal gnûv guviêr e simpri tacade a l'idee da l'indipendence che il Friûl al veve pierdude.

Vignesie no si fidave di chest so "orghin" e, no olsand a sdrumâlu, a cirî prin di imberdeâlu int'un grum di ģhambadoriis burocratichis, complicand a pueste la procedure des invistiduris, ģhavand des sôs mans lis plui impuartantis funzions judiziariis, lassand čharte blanče a lis prepotencis dai luctignints, favorind la formazion di un'altre nobiltât ch'a vignive fûr di Vignesie. E plui tard, co la miserie de int di campagne a fasè naši il pinsîr e la possibilitât di creâ un'altre instituzion ch'a ves intindiments e interès contraris a chej de nobiltât, il guviêr di Vignesie no s'e lassà sčhampâ e al metè in pîs chê čhose curiose ch'a fo la "Contadinance".

Cussì il Parlament nol rapresentà plui il popul furlan, ma nome une minorance privileġade e čhalade di neri. Ma di cheste Contadinance o vîn tal čhâv di fevelâ plui indenant.

Intant Vignesie, vie pe Sierade dal 1420, a proclamà disčhadude la sovranitât temporâl dal patriarče e si risiervà dutis lis funzions relativis.

A rapresentâ la gnove parone al fo mandât a Udin un "luctignint generâl pe Patrie dal Friûl" cun autoritât suparjù

compagne di chê dai provededôrs di tiereferme, ma cence mai determinâ publichementri fin dulà ch'a podeve rivâ cheste autoritât: cussì il luctignint al restave in prâtiche libar di fâ ce ch'al voleve.

Anche la ministrazion de justizie j vignive čholte al Parlament e metude te mans dal luctignint o dai tribunâj di Vignesie.

Al ven a jessi che il Friûl, in tal prin, al podè lusingâsi di vê dome mudât paron: ma cul timp a lâ, si visà di vê anche gambiade vite e čhapade un'altre strade: chê di čchapâ botis e di bušâ lis mans che lis mole.

VIGNESIE E I PATRIARĀHIS

La ocupazion dal Friûl par man di Vignesie a scugnive fâ naši fuartis reazioni: il Stât patriarĀhâl al jere, almancul juridichementri, une part dal Imperi e un principât feudâl in man de Glesie: e Vignesie, republiche indipendent, lu veve usurpât.

Ma l'imperadôr Sismond al veve il so cefâ parviè di berdeis anĀhemò plui gruès e la sô oposizion cuintri di Vignesie no fo ni pronte ni ghiarde e no puartà nissun risultât positîv. La Curie romane invezit, subît daspò sistemade la cuistion de šisme di ocident, si fasè sintî: ġa tal Setembar dal 1420 il pape Martin V al mandà une imbašade a Vignesie domandand che il Friûl al vignìs tornât al patriarĀche: nol riġhavà nuje. Chel an daspò al scrivè une lètare tornand a bati chel cantìn: Vignesie a rispuindè ch'a veve lis sôs resons par no contentâlu, che al plui j varès lassât al patriarĀche il guviêr temporâl di San Vît e di San Denêl e che j varès passâts, come indenitât, tresinte ducâts ad an.

Intant il patriarĀche Luduì di Teck si mostrà contrari a cualunchi intese e al cirive di fâsi judâ dal imperadôr a tornâ paron dal Friûl: si capiš che intant al seguitave a governâ chē part dal PatriarĀhât dilà des monts, fintremai su la Drau, che no jere stade ĉhapade. Dôs voltis (1422, 1431) al comparì in Friûl cun cualchi miâr di mercenaris onġharês, ĉchapand Manġan, Rosacis, Scfuse e rivand fin sot Udin. Ma i mercenaris di Tadiu di Est e dal cont di Carmagnole lu pararin indaûr. A forin fatis un grum di crudeltâts di une bande e di chē altre; e i furlans ch'a vevin judât il patriarĀche a forin ben ĉhastiâts.

Alore Luduì al presentà la cuistion al Concei di Basilee ch'al mandà la scomuniĉhe al guviêr di Vignesie (1435). Il pape Eugeni IV che nol viodeve di bon voli il Concei, al spesseà a smolâ une

assoluzion. Pôc timp daspò al murì, a Basilee, il patriarče Luduì e il Concei al nomenà patriarče Sandri di Mazovie ch'al jere vescul di Trent. Il pape, par cont so, al nomenà invezit Luduì Trevisan ch'al jere di Vignesie: e cussì si capiš cemûd ch'a veve di lâ a finî. Il Trevisan al spesseà a rinunziâ a ogni derit temporâl sul Friûl sore une buine indenitât in ducâts, e il mê s di Jugn dal 1445 il marçhât al jere fat.

Ma Vignesie no jere, ançhemò no, contente: a veve tal so teritori doi patriarçhis - chel di Acuilee e chel di Grau - e il so vescul al jere sufragani di Grau! Cussì a navigà tant cun Rome che dal 1451 a rivà adore di quartâsi in çhase il Patriarçhât di Grau ch'al diventà Patriarçhât di Vignesie, lassand te basiliche di Elie un plevanut cualunchi. E cutuardis agns plui tard a domandà la sopression dal Patriarçhât di Acuilee e l'instituzion di doi vescovâts, un a Udin e un a Cividât.

No vind podût otignî chel tant, Vignesie si contentà di fâ in maniere che il patriarče al fos simpri un dai siei citadîns. E culì al scomence un rosari di manovris di ogni fate, par no lassâsi sçhampâ di man chel cadreghìn.

A forin uns cuindis i patriarçhis vignûts daspò dal Trevisan, duçh ješûts des grandis fameis di Vignesie, duçh devotissims de Serenissime e pronts a fâ simpri i siei interès. Nissun o dibot nissun nol restà te sô residence, ma a lassarin il Friûl tes mans dai lôr viçharis. Si passavin il Patriarçhât di barbe in nevôt, nomenand cualchi nevôt coadiutôr cun derit di sucession, par no lassâ ješî di famee la çharie come s'a fos stade un lôr possediment privât: cussì i Grimans, i Barbaris, i Gradenics, i Dolfins. Si pò dî che nissune des nòminis dai patriarçhis di Acuilee fatis daspò dal Concei di Trent, no fo fate seond lis prescrizions dal Concei; si pò sustignî, cul Derit

canonic in man, ch'a forin dibot dutis inlegâls e invalidis, anče se Rome a lassave cori par doi secuj une čhosse cussì scandalose.

Si capiš che i imperadôrs a protestarin e che si sfuarčarin di rompi cheste čhadene vergonģose di usurpazions fatis tal interès de Repùbliche e in barbe a lis leģs dal Concei. La pluipart dal teritori patriarčhâl a jere ančhemò sot da l'Austrie, màssime daspò dal tratât di Noyon (1516), comprindude la sede titolâr di Acuilee; invezit la pluipart dai vescuj sogets a l'autoritât metropolitiche dal patriarče a jere dicà des monts. I imperadôrs a domandavin che, almancul une volte ogni tant, il patriarče al fos un dai lôr païs e no simpri un venezian. E viodind che mediant de diplomazie no riģhavavin mai nuje, a cirivin di sfuarčâ la man di Rome cul impedî i patriarčhis di visitâ chē part de diòcese ch'a jere dilà e anče cul improibî i predis todescs di ricognoši i patriarčhis e di ubidîju.

Nanče chest nol valè nuje: e l'unic risultât al fo chel di viodi une buine part di fedêj cence pastôr, bandonâts al disordin morâl e anče a la propagande protestante.

Rome pluitost di fâj un displasè a Vignesie, a lassà lâ, par secuj a lung, un grum di ànimis al lôr destìn. E daspò a finì cul contentâ tant Vignesie che Viene a spesis dal Friûl: al ven a jessi cul abulî il Patriarčhât di Acuilee, dividind il teritori in dôs diòcesis, metind un arcivescul a Udin par chē part ch'a jere sot di Vignesie e un a Gurize par chē ch'a partignive a l'Austrie.

Cussì il mēs di Lui dal 1751 anče chest ultin vanzum di grandece dal Friûl, chest ricuard di timps di sflandôr e di independence, al restave sacrificât par colpe de politiche e par òpare di potencis forestis ch'a faserin i lôr interès su la piel dai Furlans.

NOBILTÂT E CONTADINANCE SOT DI VIGNESIE

Ce che Vignesie no veve credût di podê fâ int'un sôl colp, al moment da l'ocupazion dal Friûl, a rivà adore di fâ daspò, a planc a planc, in doi secuj di politiche interne avonde furbe. La bestie nere pe Serenissime a jere la nobiltât furlane ch'a rapresentave il principi feudâl, la tradizion independentistiche, l'element todesc de popolazion.

Cun cheste nobiltât Vignesie a veve scugnût fâ i siei conts cuanch'a veve pleât il Friûl; parvîe di cheste nobiltât a veve scugnût instituî une forme di autonomie te region; a cheste nobiltât a veve scugnût lassâj jurisdizion e prerogativis. E di cheste nobiltât no s'infidave fregul; e no veve tuart: i çhisçhelans si jerin pleâts cu l'intenzion di tornâ a dreçâsi subite ch'al fos stât possibil.

In tal prin Vignesie si contentà di scurtâ l'autoritàt judiziarie dai çhisçhelans e dal Parlament, risiervand al luctignint o al guviêr centrâl lis causis plui impuartantis e dutis lis apelazions; j lassà ai siei luctignints libertât di fâ regolaments e riformis tal funzionament des sambleis parlamentârs; a lassà che la Comunitât di Udin, indulà che i Savorgnans a jerin parons, a çhapàs une posizion di contrast cuntri dal Parlament de Patrie e che j creàs berdeis di ogni fate.

Ma la furbarie di Vignesie a fo anchemò plui fine tal profitâsi de miserie dai contadîns e dal lôr malcontent cuntri de nobiltât par fâ naši une istituzion, a sindicât vie, in difese dai interès des vilis restadis sot jurisdizion feudâl. A scomençà cul scoltâ lis protestis e i laments di cualchi delegât mandât dai contadîns di un o di plui paîs; cul dâj spali a chestis delegazions smoland cualchi picule concession

ogni volte che si presentavin; cul mostrâsi pronte a considerâ lis lôr tristis condizions e lis propuestis ch'a fasevin.

Un pôc a la volte chesçh ricors ocasionâj a deventarin une çhosse ordenarie, e lis vilis a finirin cul nomenâsi une rapresentance stabil di "sindics" par difindi denant dal luctignint e dai magistrâts di Vignesie, e cuintri dal Parlament, i lôr interès. Cheste rapresentance si clamà "Contadinance dal Friûl".

Nol fo un sindicât di categorie come chej di cumò, parcè che la sô azion no podeve mai rivolgisi cuintri dal guviêr di Vignesie ma dome cuintri de nobiltât e dal Parlament de Patrie che le rapresentave; si podarès dî, pluitost, che Parlament e Contadinance a vignirin a constituî une "corporazion", di tip fašist, cun dôs fuarcis contrariis che, se no çhatavin la fate di lâ in convigne fra di lôr, a scugnivin pleâsi ai ordins dal luctignint o dal guviêr.

In cheste maniere il Parlament nol rapresentave plui il Friûl, ma nome une clas, une minorance privilegade e çhalade di neri dal alt e dal bas. La Contadinance, cui siei sindics generâj, cui siei cassîrs e esatôrs, cui siei revisôrs e avocats, a finì cul çholij di man al Parlament l'uniche vere prerogative che j restave: chê di compartî il pês des fazions e prestazions imponudis dal guviêr e di scuedi lis tassis.

Un pas a la volte, tra discussions, ricors e barufis, lis competencis e i derîts de Contadinance e dal Parlament a forin stabilîts e ançhe lis causis di litigâ a vignirin a mançhâ: ma intant la nobiltât a jere restade esautorade, il Parlament al veve pierdude ogni ingerence sui afârs politics e ministratîvs e, in compagnie de Contadinance, al jere deventât juste une esatorie ch'a lavorave sore nuje pal guviêr. Cussì, in prâtiche, viers la mitât dal '600 l'autonomie lassade al Friûl no jere plui che un non cence significât.

La nobiltât, sčhafojade des tassis, a scugnive dispès vendi terens e tituj ch’a vignivin comprâts di marčhadants di Vignesie; e chesčh a vignivin chenti a formâ une gnove aristocrazie foreste cence tradizions, plene di palanchis e di supierbie cuintri de nobiltât locâl scunide, disanimade e stremade, ch’a veve aromai bandonade ogni sperance e ogni dignitât e che si jere ridusude in chel stât che Ipuelit Nievo al conte tes sôs “Confesssions”, cojonanle cu la sô stupide ironie.

I BENEFIZIS DI VIGNESIE

Daûr di ce ch'a dîs la storie ufiziâl, Vignesie a puartà in Friûl la pâs, l'ordin, la sigurece, il moviment comerciâl e il progrès da l'agricolture.

Vodin mo ce ch'al è di vêr in chest discors.

Cuarant'agn daspò da l'ocupazion dal Friûl par cont di Vignesie, si scomençà a fevelâ dai Turcs che si fasevin indenant de bande de Bosgne. Vignesie no si scomponè di pluì di cussì.

Dal 1472 i Turcs a rivarin fin a Monfalcon e po fin a Cividât: lis guarnisions venezianis a tajarin la cuarde, ben sveltis.

Dal 1477 i Bosgnacs, menâts di un Scanderberg, a rivarin ca fin sul Tiliment: i venezians a sčhamparin, il Friûl al fo roseât fin sul vuès, i čhisčhej e i paîs murâts si difinderin dibessôj (no 'ndi volevin tropis a difindisi cuintri di chês mandris disordenadis).

Dal 1478 a tornin i Turcs: i venezians si sierin tes lôr fortificacions sul Lusinč e a lassin che i Turcs si ģhavin dutis lis vois sul čchanâl dal Lusinč, in vâl Čchanâl e fintremai tal Inčcharoi.

Dal 1499 a tornarin i Turcs pe ultime volte, daspò di jessi stâts fêrs mês e mês dilà dai confins: il guviêr di Vignesie nol savè fâ nujaltri, dome che al ordenà ai contadîns di sčchampâ tes citâts muradis daspò di vê brusât dut ce che no podevin puartâsi daûr. Cheste volte no vind čhatât pašon dicà da l'aghe, i Turcs a passarin dilà, si dividerin in pičuj trops, a devastarin dučh i paîs, a coparin miârs e miârs di Furlans e a tornarin a čhase lôr čhamâts di robe e di presonîrs: intant ch'a fasevin chestis impresis, no vevin dibisugne nanče di meti lis vuardiis di gnot di tant ch' a jere trimende la difese dai venezians.

Pôs agns daspò (1508), a capità la vuere cuintri dal imperadôr Massimilian: dute chê part de Furlanìe ch'a jere sot dai conts di Gurize a fo devastade dai mercenaris di Vignesie.

Subìt daspò a scomençà la vuere de lighe di Cambrai ch'a durà siet agns (1509-1516). In chesçh siet agns i paîs de Furlanìe a vioderin a cori indenant e indaûr Todescs e Venezians cui sa cetantis voltis, a passarin di un paron sot di chel altri, lis çhaporin di chesçh e di chej, a pierderin nemâj, racolts, implants, çhasis. Plui che di combatiments, la vuere a jere fate di avanzadis e di ritiradis, cun robariis e maçalizis de popolazion che no saveve a ce sant avodâsi. Par ģonte, tal Unviêr dal 1511, ch'al jere un moment di padìn, a capità la balfuerie dai Strumîrs e dai Zambarlans: Strumîrs a jerin i çhisçhelans ch'a puartavin la part dal imperadôr, Zambarlans a jerin i partesans di Vignesie. Joibe grasse di chel an (27 di Fevrâr) i Zambarlans a Udin a sbudielarin duçh i Strumîrs che ur capitarin sot, ur brusarin lis çhasis, ur robarin ce ch'a vevin di miôr.

Tra il 1615 e il 1617 a fo la vuere di Gradisçhe: vuere sconclusionade e cence risultât pal possès di chê fuartece che, comandade di Rizard di Strassold, a resistè ai Venezians fintremai che il tratât di Madrid al fasè fermâ lis ostilitâts e dut al tornà come prin. Ma intant altris paîs dal Friûl a forin sdrumâts o brusâts, altre int copade, altre robe strassade o puartade vie.

Cheste a sarès la pâs e la prosperitât vignude par mert di Vignesie.

Il maçalizi dai Strumîrs al puartà daûr une lunghe storie di svindìcs e di disordins ch'a durarin passe un secul. Lis tristic relations di Vignesie cui imperadôrs no permeterin di inviâ mai un fregul di trafic cu l'Austrie. Lis distruzions causadis des vueris a faserin creši simpri di plui la miserie; lis tassis cence misure che Vignesie a meteve, a rosearin fin sul vuès la region.

Nissun lavôr di publiche utilitât in tre secuj e mieĝ; nissun provediment par fermâ lis aghis ch'a ješevin pes campagnis; mai une sigurece su lis stradis; mai une provedence pes anadis di čharistie o pes epidemìis.

Biâts Furlans: e ančhemò si laudin di Vignesie!

CHEL DAI SPIRONS D'AUR

La Repùbliche di Vignesie a tirà il sghiret il mès di Mai dal 1797. A veve comandât in Friûl par 376 agns e cualchi mès: in dut chel timp a jere rivade adore di ridusilu come un peçot sbridinât.

No si jere contentade di ġhavâj sang di dutis lis bandis: j veve distudade l'ànime.

Nissune memorie plui de antighe indipendence, nissune brame di tornâ a vêle; nissun furlan ch'al ves podût fâ alc di bon senò sġhavâ tes čhartis dai archîvs un fregul di storie e presentâle ben morestade a un public impegnât in petečs, in lujaniis; nissun omp di biel ingegn ch'al ves podût doprâlu altri che a fâ viersučats di Arcadie e sunetessis par cualchi predičhadôr di cuaresimâj; la nobiltât scomparide o imbastardide mediant i matrimonis cui arlechîns des fameis di buteghîrs de Serenissime; la gnove nobiltât, rivade di là, imberdeade tai vizis e tai sporchečs dai cavalîrs servents; il popul instupidît te sô miserie e cence une difese, cence une fuarce, cence une dignitât.

A jerin aromai secuj che la maraveose citât a platave, sot la vernîs des sôs pieris e dai siei carnavâj cence fin, une veglece che j roseave i vuès e che j faseve fraideši la polpe; a jerin secuj ch'a veve bielġà imparât a vivi cu l'industrie dal forest, al ven a jessi speland i dordej ch'a capitavin di ogni bande a ġholdi lis sôs fiestis e a cognoši lis sôs pelandis inscueladis, e turcland cence pietât i "fedelissimi distrittuali" de Tiereferme.

Dilà de stanġhe - che le contin cemûd ch'a vuelin i turiferârs inredentisčh - il guviêr da l'Austrie al jere stât plui svelt e plui onest.

Gurize, di un čhisčhelat ch'a jere sot dai siei conts, a jere diventade une citadine di gale, cui siei palačs, cui siei zardîns e une

vite cetant plui facil e plui comude. I Furlans dilà, s'a vevin un fregul di čhâv e di spirt, a čhatavin la strade vierte par Viene e no ur mančhavin ni lis possibilitâts di butâsi fûr ni lis sodisfazions. E no forin pôs chej che si faserin onôr.

De bande di ca, invezit, al è dome Udin ch'al pò tignîsi in bon di vê vût cualchi stamp di grandece in chej secuj, parviè che cualchi luctignint ambiziôs al bramà di scrivi il so non sunt'une piere e cualchi siôr dilà, daspò comprât il titul di un nobil furlan ruvinât, al pensà d'implantâ chenti un fregul di chê borie che nol podeve mostrâ a Vignesie. Ma al è avonde pôc par un timp cussì lung.

Dal 1797 Vignesie a lassà che Napoleon - un generâl di 28 agns! - al puartàs la vuere cuintri da l'Austrie sui čhamps de Furlanìe, che i Francês a fasessin man basse di ce ch'a čhatavin di miei tes glesiis o tai palačs, ch'a manğhassin e ch'a bevessin a spalis de pùare int.

E Napoleon tornand indaûr di Leoben, le ringracià manğhanle jê int'une boçhade.

Podaspò, pestand i pîs tal palač dai Manîns di Passarian e dai Florios a Udin, s'e lassà ģhavà di boçhe e le bandonà in man da l'Austrie cul pat di Čhampfuarmid.

Daspò doi agns a rivarin i Cosacs di Suvarov a disvuedâ lis panariis dai Furlans, po a tornarin i Francês a čhastiâju di vêlis lassadis disvuedâ.

Dal 1805 al passà Massena e il Friûl, cu la pâs di Presburg, al diventà "Dipartiment di Passarian" sot dal "Regn italic" di Napoleon.

Dal 1809 a tornà l'Austrie cui arcabûs dal arciduche Ģuan, ma j toçhà di spesseâ di tornâ indaûr par difindi la capitâl, lassand il Friûl semenât di cadavars.

Dal 1813 un'altre sopressade a scovà vie par simpri i Francês e il Congrès di Viene nus lassà sot da l'Astrie un'altre volte.

Sot di chestis montanadis i Furlans lis čhaporin di chesčh e di chej, čhantand *tedeums* mo par chej mo par chesčh, pajand contribuzions e sapuartand recuisizons, robariis, manğhariis e liberazions a čhadene.

I CINQUANTE AGNS DA L'AUSTRIE

Dal Congrès di Viene (1814-1815) fintremai a la vuere dal '66 dut il Friûl al restà sot dal Ream lombard-venit ch'al veve come re l'imperadôr da l'Austrie e une autonomie ministrative, in man des congregazions - o sambleis - provinciâls e regionâls, ch'a risultave in pràtiche unevore balarine e plui formâl che altri.

Chest al è un slambri de nestre storie tant intrigôs che mai, di contâ. Il Paschìn nol à olsât a meti lis mans daprûv; chej che lu àn tratât, si son tignûts scrupolosementri tes šinis segnadis de plui conformistiche mitologie ufiziâl taliane, ch'al ven a jessi te fumate nazionalistiche creade cul intindiment di impiâ e di nudrî, in barbe a lis plui claris veretâts, l'asse plui invelegnose cuintri di dut ce ch'al pò savê di Austrie.

Disinlu subit: no vin e no podìn vê nanche l'ombre di une nostalgie par chej timps, senò altri parcè che prin dal '66 no si jere vîvs dibot nissun di tançh ch'o sin vîvs vuê; no podìn nanche insumiâsi di tornâ a viodi il Friûl tes condizions di ğa un secul; o savìn benon che la storie no torne mai indaûr par chê strade ch'a jè vignude: par fortune - a ven voe di dî! E alore, nanche a misurâ lis robis cul braçolâr de oportunitât, a Machiavelli vie, no jè plui nissune reson di lâ indenant cu lis sfloçhis.

Ma no fasin nanche stât su lis buinis relazions che, in chest moment, si son stabilidis cui nestris vicìns dilà de stanĝhe: a jè simpri une stanĝhe in jenfri; e o sin sigûrs che i gazetîrs nostrans, che in di di vuê no si sparagnin di fevelâ dai "fratelli carinziani", a son bogns di tornâ a fevelâ doman di buinore dal "secolare nemico" cu la plui çhandide disinvolture. E o savìn anche che il velen scliçât tes venis dai Furlans cu la scuele, cu la stampe, cu la propagande

fate in dutis lis manieris, al è anchemò li dentri, e un grum de nestre int no jè madure par glotisi ciertis veretâts.

Il guviêr da l'Austrie in Friûl al veve dôs peçhis tal mani: al jere, anchechel, un guviêr forest e al jere, mæssime tal imprin, un guviêr reazionari.

Il popul furlan al veve tra lis altris une peçhe: al veve pierdude, in cuatri secuj passâts sot paron, anche la memorie e la brame de sô independence. E, mæssime daspò lis sacodadis e lis vuàdulis çhapadis sot di Napoleon, al bramave dome di jessi lassât in pâs.

Il guviêr da l'Austrie, cun duçh i difiets ch'o vin ricognošûts, al fo il plui sapient, il plui provident, il plui tolerant, il plui ordenât che il Friûl al vedi mai vût. I storics patriotics si disperin a lâ a cirî il fatut che ur permeti di fevelâ di crudeltâts, di opression, di coruzion: no rivin adore di documentâ altri che cualchi incident di chej ch'a capitin sot di cualunchi guviêr: la storie di Crovich ch'al fo condanât parcè che nol veve volût consegnâ lis armis, la storie di cualchi pôcdibon mandât a fâ il soldât in Boemie daûr segnalazion dal plevan, la storie de fêmine di Osôv, contade de Percude (ma une conte no jè un document e si sa cetantis ch'indi našin di chês contis).

Noaltris ch'o vìn vude e ch'o vìn anchemò la siorte di viodi cun ce mieğs che si son difindûts e che si difindin i guviêrs di daspò, foresch e talians, cuintri dai lôr aversaris, no podìn propit sgrisulâsi a lei chês robis; noaltris ch'o vìn viodût e ch'o viodìn cemûd ch'e à lavorât la polizie taliane di daspò, no si sintin il flât di fevelâ di opression sul cont di chê da l'Austrie.

E no si varès mai di dismenteâsi che lis autoritâts comunâls e provinciâls, i tribunâj, i ufizis di reclutament, ch'a vignivin acusâts di coruzion, a jerin formâts di int nostrane e che il guviêr nol mançhave di cirî e di becâ chej tâj che no fasevin il lôr dovè.

Intant lis tassis che i Furlans a scugnivin pajâ a jerin ridiculis, di no podê nanche crodi, in confront di chês che daspò ur forin rifiladis dal guviêr talian; e no stin a fevelâ di chês di cumò.

Intant in Friûl a vignivin clamâts sot lis armis dusinte e trente fantats in dut e pardut, e la plupart a jerin di chês plumis che nissun vaive la lôr partence.

Intant la burocrazie a jere fate di počhis čhartis, di disposizions claris, di personâl rispjetôs, dret e svelto, ben šielgût, ben pajât e ben čhastiât s'al faseve falopis.

L'ordin al jere perfet, la int a jere contente, a faseve i siei afârs e si deve il bon timp. Pieri Čorut nus presente il spieli plui vêr e plui just dal Friûl di chês volte: e al è miôr di no fâ confronts! I malcontents si ju contave sui dêts e dučh a vevin il lôr parcè: ufiziâj ch'a vevin servît Napoleon e che l'Austrie no veve volût čhapâju (passand sot da l'Austrie a rineavin lis lôr ideis: ce fâ dai rineâts?); int scostumade o fanatiche ch'a veve fote cuintri dai predis (e i predis ch'a vevin cerčhâts i risultâts des ideis francesis, si capiš che no clopavin di chês bande); cualchi framasson o ebreu che si tignive in rie cui compagns talians o francês, sbisiand di riscôs.

O vîn provât a passâ cun calme dute la sfilze dai manifesčh ch'a forin publicâts, an par an, cun decrets e provediments dal guviêr e no vin podût čhatâ fregul di conferme di nissune di chês mil colpis ch'o vîn sintudis tantis voltis sul cont da l'Austrie.

O ch'al dipind dai parevôj che si dopre...

DAL '48 AL '66

Des tre “epopeis” talianis dal secul passât, il Friûl al çhapà part ative nome a la prime: a chê dal '48.

In chês altris dôs nol podè fâ altri che stâ a çhalâ filis di soldâts ch'a passavin ca e là.

Cualchi furlan sçhampât di chenti al fo a batisi a San Martin o in Sicilie cun Garibaldi (19 di numar) o in cualchi altri sît: e di chesçh, se si va a scrusignâ tes çhartis des autoritâts de Glesie, si çhate ch'a jerin robate, cence religion, scostumâts, fanatics; se si crodij a la leteradure patriotiche a jerin “purissimi martiri”. Ognidun ch'al vedi un freghenìn di çučhe al capiș subît cemûd ch'a vadin çhapadis chestis definizions e al si fâs dibessôl une idee di ce int ch'a jere.

Sui fats dal Friûl in chesçh disevot agns o vìn un sôl libri ch'al mertî let e pensât: i “Ricordi militari del Friuli” di E. D'Agostini, che - lassand de bande i siei judizis e lis sôs opinions - al riferiș un grum di particulârs e al met adun une biele vore di documents, di caratar militâr e politic, ch'a permetin di formâsi un concet, ançhe disferent di chel dal autôr. Parcè ch'al va dit che il D'Agostini, talianon e militarist, se nol sparagne lis solitis tamburadis nazionalistichis, s'al va a cirî ançhe lui cul feralut chej bruts incidents che in nissune vuere e in nissune sdrume di soldâts no son mai mançhâts, te sostance al reste ançhemò onest; e tantis e tantis voltis al ricognoș la sapience, la prâtiche militâr, il valôr e la coretece dai comandants da l'Austrie, la dișipline, la fedeltât e il spirt militâr dai soldâts; e, di chê altre bande, l'insipience, l'imprevidence, la retòriche, la confusion, i faj e lis carognadis che si fasevin.

Par capî un pôc la storie dal '48, si à di tignî amenz almancul chestis tre robis: la polîtiche sdrindulade dai prins timps di pûar Pius IX ch'a veve disconciertadis lis ideis dai predis e de pluipart dai catolics anče des nestris bandis; la rivoluzion di Viene ch'a lassave cence diretivis lis autoritâts miltârs e civîls di chesçh paîs; e il fat che in dut il Friûl, sot dal gen. Auer, si čhatavin a jessi cuatri bataljons di fantarie formâts, in part, di Furlans, di Lombards e di Venits e une sezion di artiljarie cun sîs canons: chestis fuarcis a jerin dividudis tra Udin, Osôv e Palme. E nissune sperance o possibilitât di vê rinfuarçs di nissune bande.

Cussì, co lis sollevazions a scomençarin, prin te basse Italie e po a Vignesie e in Lombardie, il gen. Radetzky al spesseà a concentrâ lis sôs fuarcis tes cuatri fuartecis dal “cuadrilatar”, e, a Udin, il gen. Auer, al consegnà cence nissune resistence la citât e lis dôs fuartecis furlanis al comitât provisorî; al lassà in libertât chej soldâts che no volevin restâ sot da l'Austrie e si ritirà cun chej altris a Gurize.

Chest risultât cussì facil e slis al inçhocà i patriots e, par un mê, invezit di pensâ che no podeve jessi finide e che il biel al veve di vignî, si bandonarin a une mate baldorie, cence armis, cence mieĝs, cence ombre di preparazion militâr: soldâts de vuardie civiche, voluntaris, carognis vignudis di Vignesie, predis e fèminis si scolarin di flât a čhantâ e a čhacaronâ. Ma un mê j bastà al Nugent, gnûv comandant de armade di risierve, par meti adun sul Lisunč uns dodismil soldâts in ĝhambe; e daspò, in cuindis dîs (dal 16 di Avrîl al 1 di Mai) al jere bielĝà dilà dal Tiliment: culî a restavin di čhapâ nome lis dôs fuartecis di Osôv e di Palme.

Udin, daspò cerčhât un fregul di bombardament, al veve capît che la vuere no jere un ĝughet e al veve molât, tra lis plui furiosis e stupidis maludizions di dute l'Italie. Palme a tignî dûr doi mê, Osôv fin al mê di Otubar (dibot cinc mê). Tant il Nugent a Udin che il

van der Null a Osôv si compuartarin cun moderazion, a faserin condizions onoradis e a lassarin che i soldâts rindûts a lessin pai lôr fats: robis che in di di vuê a fasaressin ridi nome a pensâlis.

Vignesie in chê ocasion a pensà ai siei fats cence mandâj nissun jutori ai Furlans, daspò ur struçhà daprûv un grum di insolencis.

Adimplen la balfuerie a passà cence grandis consequencis pal Friûl de bande dal guviêr da l’Austrie: nome i Furlans, scotâts, a tignirin amenz la lizion. E cussì, dîs agns daspò, in chê volte de seconde vuere, a sterin a çhalâ sul puarton di çhase i Todescs ch’a levin viers Solferin; e dal ’66 a spietarin cun pazienze e cun rassegnazion che Todescs e Talians a finissin di lâ indaûr e indenant.

Une prove di organizâ partesans su lis monts, fate dal ’64-’65, par ordin di Mazzini, a finì in nuje pal sçhars numar di chej ch’a rispuinderin e pe mançance di coordinazion.

Tirand lis sumis, la int ch’a lassà in Friûl la plui brute memorie a forin i “crosâts” di Vignesie rivâts a Palme ai 10 di Avrîl dal ’48 cul Grondoni (e cun dutis lis benedizions dal patriarçe: “la feccia della società in fatto di scostumatezza e di prepotenza”, al scriveve il president dal comitât di Udin al comandant Zucchi di Palme); il majôr Josef Tommaselli ch’al comandave il bloc cuintri di Osôv, cussì trist che nanche i soldâts todescs no volevin plui ubidî i siei ordins; i Triestins e i Istrians vignûts a presidiâ Udin ai 22 di Jugn dal ’66 tal puest dal regiment dal granduche di Baden ch’al leve in linie.

Il mêis di Otubar dal ’66, l’Austrie, ch’a veve pierdude la vuere cu la Prussie a Konigsgratz (Sadowa), a scugnì cedi il Friûl a l’Italie ch’a jere stade in lighe cu la Prussie. E ai 14 di Novembar al rivà a Udin re Vitôr Manuêl II.

Il gnûv guviêr j lassà čharte blanče a dučh i elements de massonarie nazionaliste ch'a trionfave a Florence e, daspò, a Rome; al spesseà a meti in vigôr dutis lis leĝs, mæssime chês cuintri predis e glesiis, e dutis lis tassis ch'a pesavin sun chês altris regions; al implantà l'ordenament burocratic incentrât e confusionari ch'al veve ereditât di Napoleon; al mandà dentri par amalgamâ i Furlans une sdrume di funzionaris, impleâts, cuesturìns e carabinîrs de basse Italie; al sčhadenà tes scuelis e tes placis la plui disperade propagande cuintri da l'Austrie ch'a comandave ančhemò dilà dal Judri.

E i Furlans, sčhafojâts di retòriche e di miserie, a scomenčarin a miârs e miârs a fâ il baûl e a lâ pal mond.

Il rest al parten a la memorie dai viêj ch'a son ančhemò in chest mond e ch'a puedin contâlu dibessôj.

CCA @ 1994

Cincuantecuatresim titul de Clape culturâl Acuilee

Te cuvierte *Il Friûl* di Ul De Rico

Imprimé au Frioul - Stamparie Designgraf